

BOKONO YA

KOBÓSA NA MOLIMO



Sikawa nandimi, sikawa nandimi,
Nyonso ekoki kosalema, sikawa nandimi;
Sikawa nandimi, sikawa nandimi,
Nyonso ekoki kosalema, sikawa nandimi.

² Totikala ya kotelema mwa moke sikawa mpo na Liloba na Nkolo. Tókamata Amosa, mosakoli Amosa, mokapo ya 3, kobanda na molongo ya 1.

³ Nalingi kotóna Ndeko mwasi Juanita, ná Anna Jeanne mpe Ndeko mwasi Moore, mpo na banzembo ya kitoko wana. Ezóngisaki ngai na ntango ya kala, wana nafandaki kuna mpe nazalaki koyoka yango. Nazalaki kokanisa, ntango bazalaki elongo na biso, bazalaki koyemba na mayángani, Ndeko Jack ná ngai tozalaki kosolola, bana basi yango bazalaki bana basi ya mike mpenza, ya mibu zomi na motoba, eloko moko ya ndenge wana, bana basi. Sikawa, nakanisi, Ndeko mwasi Anna Jeanne akómi na bana mitano, mpe Ndeko mwasi Juanita azali na—azali na . . .mama ya bana mibale. Mpe, bandeko basi, tokómi mpenza pene na kolála ya mói wana, koleka ndenge tozalaki na ntango wana, eleki pene na mibu zomi na motoba. Kala mingi te, tokokátisa na ngámbo, na ntango ya nkembo wana.

⁴ Sikawa na Amosa mokapo ya 3, tótanga.

Bóyoka liloba oyo YAWÉ alobi kotemela bino, E bana na Yisalaele, kotemela libota mobimba lilongolaki ngai . . . na mokili ya Ezipito, etc,

Nayebi bobele bino . . .na mabota nyonso ya mokili: bongo nakopesa bino etumbu mpo na lisumu na nko . . . na bino.

Bato mibale bakotambolana nde elongo naino bazali kondimana te?

Nkosi akongala nde na zámba naino asili azui bilei te? elenge na nkosi akonguluma na efandelo na ye soko ye azui eloko te?

Ndeke ekokweya nde na motambo likolo na mabelé soko motambo ejangi kotandamela ye? motambo ekopumbwa likolo na mabelé soko ekamati eloko kati na yango te?

Kelelo ekobétama nde na mboka mpe bato bakozanga kobánga? mabe ekokweya na mboka mpe YAWÉ asali mosala te?

Solo Nkolo... akosala likambo te bobele ete akomonisa ba-sekelé na ye epai na baombo na ye, bango basakoli.

Nkosi asili angulumu, nani akobanga te? Nkolo... asili alobi, nani akosakola te?

Tógumba mitó.

⁵ Nkolo Yesu, tika ete Liloba na Yo, Nkolo, tika ete tósala boyokani na bondeko na mpokwa oyo zinga-zinga na eteni oyo. Tobondeli, Nkolo, ete Ópesa biso ndimbola mobimba mpo na motó ya liteya yango, oyo tokozua na esika yango, mpe tika ete émemela Yo lokumu. Pámbola biso wana tozali kotalela, Nkolo, na mpokwa oyo, Liloba na Yo. Bíkisa babéli mpe bato na mawa. Bíkisa baoyo babungi. Pesa makasi na baoyo balembi, Nkolo, baoyo babandi kolemba, na nzoto mpe na molimo. Mpe sopá mpenza Bozali na Yo likoló na biso, mpo tosenji yango na Nkombo na Yesu. Amen.

⁶ Nakosepela kozua motó ya liteya moko, uta na yango, na mpokwa oyo ete: *Bokono Ya Kobósana Na Molimo.*

⁷ Bóbosana te, lobi, ezali libondeli mpo na babeli lobi. Tozali kozela ete Nkolo ásala makambo ya minene koleka, lobi na nsima ya nzánga, na ngonga ya mibale, epai to... ntango tokobanda liyangani na biso. Mwana na ngai akozala awa mpo na kokabola ba-kálati ya mabondeli. Mpe tokobondela mpo na moto nyonso oyo alingi ete tóbondela mpo na ye. Mpe tozali kozela kolekisa ntango moko ya nkembo, lobi, kati na Nkolo.

⁸ Sikawa bino baoyo bozali awa, oyo bozali bapaya na engumba oyo. Bóbosana te, ezali ba-losambo ya malamumu, ya litondi ya Nsango-malamumu na engumba mobimba. Bokoki kokende na nyonso wana.

⁹ Nazalaki kosolola ná moko na bakengeli oyo tozalaka na boyokani, na libanda, auti kokóta, Ndeko Jackson, azalaki liboso na lingomba Metodiste, kuna na engumba moko to mibale na nsé na biso.

¹⁰ Bato boni bazali awa, oyo bazalaka na boyókani ná tabernacle, bótombola maboko, bazali bipai nyonso. Oh la la, naza solosolo—solosolo na esengo ya kozala na bino awa. Oyo nde liyangani ya pene koleka mpenza na Indiana oyo natikali kozala mpo na mwa ngonga. Nazali kokanisa na ntina na koya lisusu, kala mingi te, kotelemisa hema moko mpo na koteya Bakelelo nsambo oyo ya nsuka, soki Nkolo alingi.

¹¹ Boye, sikawa, kasi bómikanisela lobi. Bóbosana yango te, lobi na ngonga ya mibale. Mpe, sikawa, mayangani na biso oyo ekolanda ekobanda na mpóso ekolanda, na Tampa, na Floride.

¹² Sikawa nalingi kolobela: *Bokono Ya Kobó-... Kobósana Na Molimo.*

¹³ Sikawa, mwana mobali oyo tozali kolobela, Amosa, kaka mpo na ngonga moke, mpo na kozua mobóko na biso liboso tókende na liteya yango. Likambo oyo esalemaki na ntango ya bofúluki monene na Samalia. Yisraele basilaki kofúlúka. Basilaki kolanda mpenza mokili mpe bafúlúkaki.

¹⁴ Bofúluki ezalaka ntango nyonso elembo ya mapamboli na molimo te, kasi mbala mosusu ezalaka nde bokeseni. Bato bakanisaka ntango mosusu ete osengeli kozala na biloko mingi ya mokili, mpo étalisa ete Nzambe azali kopambola yo. Ezali solo te. Mbala mosusu ezalaka ndenge mosusu.

¹⁵ Kasi tomoni ete ye, toyebi mingi te na ntina na mwa mobali oyo. Ye, tozali na histoire te, kolobela epai ye autaki. Toyebi ete ye, kokokana na Makomi awa, azali mobateli bibwele, kasi Nzambe atelemisaki ye.

¹⁶ Nakoki kobanza komona, na mokolo moko ya moi makasi, kuna na Samalia, oyo ezalaki moko na bingumba minene ya tourisme na mokili, na eleko wana. Ezalaki engumba moko, tóloba, lokola Miami, to—to Hollywood, Los Angeles, moko na bisika ya ndenge wana, esika moko ya monene mpo na ba-touriste. Mpe tokoki bobele kobanza ete tozomona ye. Atikálá kozala na engumba ya ndenge wana te. Kasi, azalaki na Liloba ya Nkolo, azalaki koya na engumba monene oyo, epai wapi masumu etóndaki na ngámbo nyonso. Batei nyonso basilaki kokende mosika na Liloba na Nzambe, mpe bazalaki na mosakoli te elekaki mibu ebele.

¹⁷ Na boye mwa mobali oyo, wana ekómaki ye likoló ya ngomba, na ngámbo na nordi ya Samalia, nakoki kobanza komona ye, moi makasi kongala, mandefu na ye ya mpembe etondi ye na elongi, mpe mwa miso na ye ekómaki mike, mpe mwa motó na ye ya libandi ezalaki kongenga, wana akitisaki miso na engumba yango. Mpe miso na ye ekómaki mike. Azalaki kotala makambo oyo ba-touriste batálaka na momesano te, kokende na engumba moko, mpe kotalatala biloko na yango ya kitoko mpenza. Atalaki mpe amonaki oyo engumba yango ekómaki, engumba oyo ezaláká engumba ya Nzambe, kasi bomoto na yango ekweyaki na nsé mingi mpenza. Kokamwa te. . .

¹⁸ Mwa mobali oyo, ayebaná te, ezalaki Amosa mosakoli. Sikawa toyebi mpenza mingi te na ntina na ye. Toyebi te epai wapi autaki. Na momesano, basakoli bakótaka na mosala bayebani te, bakendeke mpe ndenge moko. Toyebaka te esika nini bautaka, esika nini bakendeke, toyebaka te ebandeli ya bomoi na bango. Nzambe atelemisaka bango kaka boye. Azalaki mpenza eloko moke te ya kobenda bokebi, kasi azalaki na YANGO ELOBI NKOLÓ. Yango nde eloko ya motuya oyo namoni. Na ntembe te, ayaki na Samalia mpo na kobanda mayangani na ye. Nandimisami ete ata moto moko te alingaki

kosála ná ye elongo. Azalaki na kalati ya boyokani ya ebongiseli moko te. Azalaki na mokanda moko te mpo na kolakisa lisanga nini ye autaki. Mpe, kasi, azalaki na eloko moko kaka, azalaki na Liloba ya Nkolo mpo na engumba wana.

¹⁹ Mpe nazali komituna, soki tokokaki komema Amosa, lelo, kino na ntango na biso, Nazali komituna soki alingaki koyambama na engumba na biso lelo. Nazali komituna soki tolingaki koyamba ye, to tolingaki kosala kaka ndenge bango basalaki. Tomoni ete bingumba na biso mpe ekwei ndenge moko. Tomoni mpe lisumu ekómi mpenza mingi katikati na bato, ndenge ezalaki na eleko wana. Mpe nazali komituna soki mwa mobali oyo, ayebaná te, akobanda mayangani oyo ndenge nini? Akobanda ndenge nini, esika nini? Akokende na losambo nini, to nani akolinga kosala elongo ná ye? Azalaki na eloko moko te mpo na kolakisa epai autaki, azalaki na eloko moko te, bobele YANGO ELOBI NKOLO mpo na engumba yango.

²⁰ Akutaki bango ya kopola mpenza ná bomoto ebéba mpenza, ezalaki ntango moko monene. Basi na engumba wana bakómaki, tóloba, ndenge bakómi na Etats-Unis. Basilaki kobeba mpenza. Nyonso oyo Nzambe azalaki kozela epai na bango, bango bakendeki mpenza na ngámbo mosusu. Mpe—mpe tomoni ete ezalaki esika moko monene epai oyo bazalaki kobina na balabala, bomoto ya basi ebebaki mingi, bakómaki kolongola bilamba, mpe bongo na bongo, lokola na striptease. Ya solo, na mikolo wana ezalaki mpo na kospelisa bato, lelo ekómi mikolo nyonso. Soki kaka molunge ebandi, ozali lisusu na ntina ya kokende na esika ya biyenga te. Bango nyonso bazalaka na balabala, ata esika nini, ata ndenge nini. Nsóni na bino basi, mpo na kosala likambo ya ndenge wana! Bomiyokaka nsóni te?

²¹ Na bongo—na bongo nalobaki bongo epai ya mwasi moko awa, eleki ntango molai te, mpe alobaki: “Ee,” alobaki, “Ndeko Branham,” alobaki, “wana, wana ezali—wana ezali kaka ndenge basi nyonso basalaka.”

²² Nalobaki: “Kasi biso tosengeli kosala lokola bato nyonso te. Tozali ndenge mosusu. Tozali na—na ezaleli ya ndenge mosusu.”

²³ Ekundolisi ngai mwasi moko, oyo alobaki: “Ee, Ndeko Branham,” mosusu alobaki: “Ngai na—na—nalátaka ba-kupé wana te.” Alobaki: “Nalátaka ba-pantalón.”

²⁴ Nalobaki: “Oyo wana ezali mabe koleka.” Ah! “Nzambe alobaki: ‘Ezali mbindo,’ na miso na Ye, ‘mpo na mwasi kolata elamba ya mobali.’” Ezali mpenza solo.

Mosusu alobaki: “Ee, batongaka lisusu bilamba mosusu te.”

“Bazali naino kosala ba-masíni ya kotonga bilamba ná bazali na biloko ya kotonga bilamba.”

25 Nzela ya komílongisa ezali te. Ezali mpenza eloko oyo ezali na motema. Yango nde oyo emonanaka libanda. E—emitalisaka polele.

26 Sikawa tomoni ete, na engumba oyo, bomoto ebebaki mpenza. Batei bazalaki kobánga koloba likambo na ntina na yango. Mpe, kasi bazalaki na mwa, mwa mobange mobali oyo azalaki komata likoló na ngomba, azalaki koya koyebisa bango YANGO ELOBI NKOLO: “Bópetola yango na mobimba, soki te bokokende na boómbó.” Mpe atikalaki na bomoi komona mikolo oyo lisakoli na ye ekokísamaki. Asakolaki na mikolo ya Yelobowama ya Mibale, oyo akómaki mpenza moto mpamba, ata bongo; a—akómaki kosunga bikólo mosusu. Mpe—mpe Amósa moke oyo asakolaki mpe ayébisaki bango, alobaki: “Nzambe yango moko oyo bolobaka ete bosálelaka, Akoboma bino.” Mpe Asalaki yango.

27 Mpe soki mongongo na ye ézalaka awa na mpokwa oyo, na kati ya . . . na Birmingham, elingaki koloba ndenge moko na mangomba. “Nzambe yango moko oyo bolobaka ete bosálelaka, akoboma bino mokolo moko.” Nazólobela eyanganelo oyo te. B—bande oyo ekendeke na mokili mobimba. Sikawa, bóbosana te, ezali solo.

28 Na nsima amonaki, ntango akotaki na engumba yango, ete ye . . . makambo nyonso wana, nazali komituna ndenge nini asengelaki komiyoka kotala mpe komona kokweya wana ya bato na Nzambe, epai na baoyo atindamaki.

29 Nazali komituna soki biso tolingaki koyamba ye lelo? Soki áyaka awa, tolingaki—tolingaki nde kosala elongo ná ye? Tolingaki kosunga ye na—na motema na biso mobimba? Tolingaki koyoka ye na bokebi? Tolingaki kobóngola mitema soki áyebisaka biso ete tosengeli kozonga na Liloba ya Nkolo mpe kosala lolenge oyo Nkolo alobaki ete tósala?

30 Nazali komituna eloko nini bandeko na biso ya basi balingaki kosala mpo na suki na bango oyo bakátá? Balingáki kotika ete suki na bango ékóla lisusu, soki Amosa áyaka? Alingaki koteya yango, mpe ngai nazali koyebisa bino yango, mpo yango nde Liloba na Nkolo.

31 Na—nazali komituna soki—soki makita na biso, oyo etiáka na mosala basungi oyo babálá mbala misato to minei, mpe—mpe bongo na bongo ndenge wana, oyo balukaka kokóma basungi, nazali komítuna soki makambo nyonso oyo, namitúnaka eloko nini alingaki kosala na mobali oyo atíkaka mwasi na ye álata kupé mpe ábima kuna na balabala, mpo ákata matiti, kuna na lopango, ntango mibali bazali koleka wana? Nazali komituna eloko nini alingaki koloba na mobali ya ndenge wana?

32 Na ntembe te, alingaki kopámela yango na makasi na ye nyonso, mpo azalaki na YANGO ELOBI NKOLO, mpe akokaki kosala eloko mosusu te bobele wana. Akútáki bango, na mokolo

wana, ná bokono moko ya mabe, bokono ya kobósana na molimo, mpe yango mpenza nde tozali na yango lelo.

³³ Sikawa, ayebaki ndenge nini likambo oyo elingaki kosalema? Amosa alingaki koyeba yango ndenge nini? Ya liboso, azalaki mosakoli. Mpe, ya mibale, ayebaki kokokana na bokono yango, oyo diagnostik yango ezalaki, mpe alingaki koyeba nini makambo yango ekopesa.

³⁴ Soki monganga atali tumeur oyo ekoméli moto mpe amoni ete tumeur yango esili kobota misisa, ayebi ete eloko mosusu etikali te, kaka liwa. Esili, loba kaka ete Nzambe ásala likambo moko na ntina na yango.

³⁵ Ee, soki otali engumba moko, mpe otali bato, otali lingomba, mpe otali bato oyo bazali mpenza mosika na Nzambe, okomona bokono mosusu te, diagnostik ekozala kaka “Lisumu! ‘Mpe lifuti ya lisumu ezali liwa.’ Ezali kokufa.” Diagnostik etalisaka polele oyo yango ezali. Bomoni, soki bato batiki Nzambe mpe baboyi koyoka Liloba, bazali lisusu na mposa ya Liloba te, na bongo diagnostik moko ezali mpo na yango: “‘Elimo oyo esalaka lisumu, elimo yango ekokufa.’ Kozanga kondima ekokabola yo na Nzambe.” Ezali mpenza bongo.

³⁶ Na bongo, ayebaki oyo bokono yango, mbano yango ezalaki, ntango amonaki bokono ya—ya lisumu na engumba yango.

³⁷ Sikawa, bokono ya kobósana oyo, toyókaka ete ezali e—e—e. . . esalaka ete ókóma na esika oyo okoki lisusu komiyeba te. Sikawa, ezali likambo ya momesano te. Esalemaka mingi mingi te, kasi eutaka na botutani ya motema. Ezali moto oyo ayebi ata te nani ye azali. Esalemaka nsima na bitumba, ntango mosusu, basodá babélaka yango. Ntango mosusu bato babélaka yango. Eloko mosusu oyo epésaka yango, ezali mitungisi. Mitungisi epésaka yango.

³⁸ Mitungisi ezalaka na nguya moko te, ata moke te. Iyo, bó—bó—bókimaka mitungisi, mpe bóyambaka kondima.

³⁹ Moto moko alobáki: “Ee, sikawa, boye soki bakobeta yo masasi na ntongo, okomitungisa te?”

Nalobaki: “Te, nandimi te.”

“Mpo na nini?”

Nalobaki: “Mitungisi ekoki kosala eloko mosusu te, kaka kobakisela ngai mpasi.”

“Ee, kozala na kondima ekosunga na nini?”

Nalobaki: “Ekoki kokangola ngai.” Mpe wana ezali solo, bomoni.

⁴⁰ Boye, mitungisi ezalaka na nguya moko te, ata moke te, kasi kondima ezalaka na nguya nyonso. Bóndima!

Sikawa, mbala mosusu, eutaka na mitungisi.

41 Mpe eloko mosusu oyo esalaka yango na bato, ezali kozuama na katikati ya makanisi mibale. Yango ekopesa bokono ya kobósana. Mpe ememaka na esika oyo yo—yo, kútu, eloko oyo ekómeli yo, osili kobúngisa mabanzo na yo. Osili kobungisa makanisi. Okoki te kosala . . . Oyebi te nani yo ozali. Ozokoka lisusu komiyeba te. Okoki kotámbola, kolia mpe nyonso wana, kasi, yo, ata bongo, ozokoka lisusu komiyeba te. Ozali na mayele na yo ya université, okoki na yo . . . mayele moko ya kelasi oyo ozuaki, kasi ozoyeba lisusu epai eúti te, oyebi lisusu te nani oyo yo ozali, esika oyo yo ozalaka. Yango nde bokono ya kobósana, ndenge toyokaka.

42 Toyebanaka ná mabota na biso, na bomoi oyo ya bato, na nzela na libala. Mpe ná basi na biso, tobalanaka, mpe libota na biso eyebanaka na nzela ya kosangana ya—ya—ya libala na biso. Na nsima, tokokanisa nini, bongo soki likambo ya nsomo oyo ekómeli yo mpe ozali lisusu na makoki ya komikanisela te nani yo obálá, mwasi na yo azali nani, bana na yo bazali banani, tata ná mama na yo bazali banani, mozalani na yo azali nani? Wana ekozala li—likambo moko ya nsomo.

43 Na nsima toyebanaka, lisusu, tokoki komiyeba katikati na bato, na nzela ya kozala na mayele mpe—mpe kokesana na bomoi ya banyama. nyama ekoki kokanisa te, alandaka kaka makelele. Ezalaka na elimo te. Mpe, kasi, biso tozali na bomoi ya nyama. Eloko oyo esalaka ete tókesana . . . Tozali ba-mammifère, kasi oyo . . . Ba-mammifère bazali banyama oyo bazalaka na makila ya móto, mpe biso tozalaka na lolenge ya nyama. Kasi eloko oyo esalaka ete tókesana, tomiyebaka ete tozalaka na elimo, lisosoli oyo etalisaka biso bolamu ná mabe.

44 Sikawa esika moko ezali, ntango obeli bokono ya kobósana oyo, okoki kokóma lokola Nebukadanesala, ndenge esalemaki, oyo amitómbolaki na ntango moko, mpe Nzambe asalaki ete ákanisa ete azalaki nyama. Mpe akómaki kofanda na lisobe mpe—mpe kolia matiti lokola ngombe. Mpe—mpe suki na—na ye ekólaki nzoto mobimba, lokola nsálá ya mpongo, mpe motema na ye ekómaki lokola oyo ya nyama. Bomoni? Ezalaki bokono ya kobósana, mpo abosanaki ete azalaki mokonzi. Abosanaki ete azalaki moto. Mpe akanisaki ete azalaki nyama, na bongo akómaki kobika lokola nyama, mpo abosanaki ete azalaki moto.

45 Ekómi mpenza pete, lelo. Tobosanaka, mbala mosusu, oyo Lingomba ya Baklisto ezali. Tokómaka na bizaleli ya mokili. Yango nde elakisaka ete obeli bokono ya kobósana na molimo, mpo ozali kobika lokola Moklisto te. Ozali kobika lokola mokili. Okómi na motema ya mokili, mpe epesi oyo.

46 Awa to—tomoni ete Yisraele bakómaki, bamipesaki na mokili, mpe bakweyaki na kati ya libulu oyo. Mpe mosakoli oyo atindamaki mpo na kobimisa bango libanda na yango, soki akokaki, mpe koyebisa bango. Nzambe, na ngolu na Ye, aponaki

Yisraele kati na mabota nyonso ya mokili. Ngolu nde esalaki yango. Apesáká bango mabelé ya malamumu koleka. Apesaki bango bandako oyo bango batongáká te. Nzambe nde asalaki yango, aponaki bango. Apesaki bango bilanga oyo basombáká te. A— Apesaki bango, Apesaki bango bilei oyo balonáká te. Apesaki bango mabulu ya mai oyo batimoláká te. Apesaki bango balónga oyo balóngáká te. Apesaki bango ngolu oyo babongáká na yango ata moke te. Nzambe asalaki yango na ngolu na Ye mpo na libota oyo, Yisraele, baponami na Ye, balingami na Ye.

⁴⁷ Mpe Alobaki, na Biblia ete: “Akutaki ye na kati ya elanga, lokola mwana mwasi oyo afandi na kati ya makila na ye moko, Asukolaki ye mpe Apetolaki ye, mpe nyonso oyo Asalaki. Kasi nsima na Nzambe kotalisa ye mawa nyonso wana, mpe nsima na ye kokóma na bozwi,” abelaki bokono ya kobósana, bokono ya kobósana, “mpe abósanaki mpenza bisika oyo biloko yango eutáki.”

⁴⁸ Nakanisi ete yango nde elilingi ya U.S.A., na mobu 1964. Ezali kobela bokono yango moko. Tozali mangomba minene ya nguya. Tozali libota monene ya nguya. Tozali ba-milió na motango, kasi tobosani bisika oyo biloko yango eutáki.

⁴⁹ Bokono mabe wana ebetaki bango. Nsima na Nzambe kozala malamumu epai na bango, kolongola bango na bikólo nyonso ya bapakano, mpe kokómisa bango libota oyo etiami pembeni, atiaki bango pembeni mpo na Ye moko. Alobaki: “Azuaki mobimbi moko na ekólo moko mpe Alónaki yango na ekólo mosusu, mpe Abongisaki yango malamumu mpenza mpo ébota mbuma mpe ébota mbuma mingi, kasi mobimbi yango ebosani esika oyo mapamboli na yango eutáki.”

⁵⁰ Ezali mpe bongo mpo na libota na Nzambe, na mikolo oyo ya nsuka, esili kobósana ntina ya kozala na litatoli ya Moklisto. Esalemi lisusu, bokono ya kobósana ebeti bato. Bazokoka komiyeba te.

⁵¹ Bango, babosanaki nyonso na ntina na Yango. Babosanaki bosantu na Ye. Babosanaki mobeko na Ye. Bási yango bakómaki kobika lokola basi mosusu nyonso.

⁵² Lingomba ya Nzambe ná bato na Ye bazalaka ntango nyonso: “Libota oyo etiami pembeni, li—libota oyo ebengami libanda, libota ya ndenge mosusu, ekólo mosantu, bonganganzambe ya bokonzi; kopesáká Nzambe mbeka ya molimo, mbuma ya bibebu na bango, kopesáká nkembo na Nkombo na Ye.” Nzambe abengaki Lingomba na Ye mpe akabolaki Yango na mokili, na ntina wana mpenza. Mpe Apesaki yango mobeko, mpe Ye, Yango esengeli kozala mosantu. Alobaki: “Ngai nazali mosantu, bino mpe bosengeli kozala basantu, kasi kozángá bosantu, moto moko te akomona Nkolo.” Nzambe Ye moko nde alobaki yango.

⁵³ Mpe Abengáká libota yango mpo bákóma lolenge ya bato yango, kasi babosanaki yango. Babosanaki mibeko na Ye, mpe

babosanaki bomoto na bango. Bási na balabala, basi ya Yisraele kuna, moko na moko azalaki kokanisa ete—ete akokumba zemi ya Molimo Mosanto, mpo na kobota Masiya, na bongo bakomaki kosala makambo ya ndenge wana. Ezaleli na bango ezalaki nsómo.

⁵⁴ Nalingi kotelema awa miniti moke, mpo na koloba ete ezali ndenge moko katikati na bato na biso, lelo, baoyo bamibengaka Baklisto. Ezaleli na bango, soki bokokaki bobele kosósola!

⁵⁵ Mokolo moko, na Súdi. Natángaki lisolo oyo esálemáká kuna, esika oyo ntango bazaláká na baómbo. Bazalaki kozua bato yango mpe koteka bango na zándó, kaka ndenge batékaka motuka ya kala. Na bongo mosómbo, moto na mombóngo moko, azalaki koya kozua baombo yango mpe koteka bango, kaka ndenge batekaka motuka to eloko moko bongo.

⁵⁶ Baombo yango bazalaki mosika na bikólo na bango. Bautaki na Afrika. Ba-Boer bayibaki bango, bamekaki bango awa na bisanga, na nsima bazalaki kokotisa bango na mayele Etats-Unis mpe koteka bango lokola baómbo, kouta na Jamaïque mpe zinga-zinga.

⁵⁷ Sikawa tomoni ete bato yango bazalaki na mawa. Bautaki koyiba bango na bambóka na bango mpenza. Monguna moko asilaki komema bango kuna, mpe bazalaki na mawa. Bakotikáláká lisusu komona mibali na bango te, to basi na bango lisusu te, batata ná bamama na bango, bana na bango. Bazalaki mpenza. . . Basengelaki kobeta bango fimbo, mpo na kosalisa bango mosala, mpo bazalaki bato na mawa.

⁵⁸ Mpe mokolo moko, moto na mombongo moko alekaki na elanga moko boye, amonaki lipinga ya baómbo kuna oyo bazalaki kosala mosala. A—akotaki mpe atunaki mokólo na bango, alobaki: “Ozali na baómbo boni?”

Alobaki: “Pene na monkama.”

Alobaki: “Ozali na baoyo okolinga kosómbitinia to kotéka?”

Alobaki: “Iyo.”

Alobaki: “Pesa ngai nzela ya kotala bango malamú.”

⁵⁹ Mpe akendeki kotala bango na kati ya elanga, mpe amonaki ete basengelaki kobeta bango fimbo. Nsima na mwa ntango, amonaki elenge mobali moko oyo bazalaki na ntina ya kobeta ye fimbo te. Azalaki kovimbisa ntolo mpe kotómbola mbánga; bazalaki na ntina ya kobeta ye te. Bongo moto na mombongo yango alobaki: “Nalingi kosomba moómbo yango.”

Mpe alobaki: “Kasi ye azali ya koteka te.”

⁶⁰ Alobaki: “Ee, eloko nini esali ete moómbo yango ázala ndenge mosusu?” Alobaki: “Moombo yango nde mokonzi na bango nyonso?”

Alobaki: “Te, azali kaka moómbo.”

Alobaki: “Ee, ntango mosusu oleisake ye ndenge mosusu.”

Alobaki: “Te, aliaka na makusa elongo ná baómbo nyonso.”

⁶¹ Alobaki: “Ee, eloko nini esali ete ákesana mingi na baómbo nyonso?”

⁶² Alobaki: “Ee, nazalaki mpe komituna likambo oyo, ntango molai. Kasi mokolo moko nayokaki ete, kuna na mboka oyo aútá, tata na ye azali mokonzi ya ekólo mobimba. Mpe atako azali mopaya, mpe mosika na mboka na ye, kasi ayebi ete azali mwana ya mokonzi, mpe a—amikambaka lokola mwana ya mokonzi.”

⁶³ Namilobelaki: “Kasi, oyo wana, soki Moto moindo oyo aútáki na Afrika, ayebaki ete tata na ye azali moto ya mboka moko mpe mokonzi ya ekólo moko, yango esengelaki kosala nini na Moklisto oyo abótami mbala mibale, mobali to mwasi oyo ayebi ete Tata na biso azali Mokonzi ya Lola na Nkembo!” Tosengelaki komíkamba lokola Baklisto ya mibali mpe ya basi. Tosengelaki komikamba bongo, koláta bongo, kosolola bongo, kobika bongo. Atako tozali bapaya, kasi tozali bana ya Mokonzi. Amen.

⁶⁴ Ezaleli na biso, kobeba ya bomoto na biso na mikolo oyo tozali kobika kati na yango sikawa! Yisraele ekweyaki na libulu moko wana, mpe babungisaki mpe bomoto. Babosanaki mibeko ya Nzambe, ete: “Okosala ekobo te, mpe okulúla mwasi ya mozalani na yo te,” mpe bongo na bongo. Babósanaki mibeko yango. Ba—ba—balingaki yango lisusu te. Mpe ba—balingaki ko—kokóma lokola mokili mobimba, kaka ndenge lingomba ekómi lelo.

⁶⁵ Mokolo moko, Yisraele, ntango babandaki, bakómaki na mposa ya kozala na mokonzi likoló na bango. Samuele ayebisaki bango, mosakoli oyo atindamaki epai na bango, alobaki: “Sikawa, nasílá nde koyebisa bino likambo moko na Nkombo na Nkolo kozanga kokokisama?”

Balobaki: “Te, osálá yango te.”

⁶⁶ “Nasílá nde kobondela bino mpo bópesa ngai bilei ná mbongo, mbongo na bino mpe, mpo ná ngai kobika na yango?”

⁶⁷ “Te, osálá yango te. Otikálá koloba na biso likambo moko te, Samuele, kozanga ete ékokisama. Mpe otikálá kosenga biso mbongo na biso te, mpo óbika na yango. Kasi, ata bongo, biso tolingi kaka kozala na mokonzi, ata ndenge nini.”

⁶⁸ Nzambe alobaki na Samuele: “Tika bango bázala na ye. Baboyi yo te; baboyi nde Ngai.”

⁶⁹ Yisraele mpe bakómaki na lolenge moko wana. Balingaki lisusu basakoli ya Nzambe te. Bazalaki na ntina na bango te. Mpe soki moko alingaki koya komemela bango Liloba, mpe komeka kozóngisa bango na Liloba, balingaki koboya Yango. Basalaka ntango nyonso bongo, ntango bakómaka na lolenge wana ya libebi.

⁷⁰ Ntango mokili ná lingomba esangani elongo, na bongo balingi lisusu makambo ya molimo te. Balingi YANGO ELOBI NKOLO te. Balingi oyo bango balingi. Balingi mokili, mpe koloba ete bazali Baklisto; mpe kobika na kati ya mokili, kobika elongo ná mokili, mpe kobika lokola mokili, kasi kokóba koyámbola ete bazali Baklisto. Boyebi, likambo ezali ete, ezali bokono ya kobósana na molimo. Ezali mpenza yango. Bayebi te banani bango bazali. Basili kobósana ete oyo wana nde basengeli kosala.

⁷¹ Soki mosakoli moko ayei lelo, ndenge wana, bakoboya ye kaka ndenge moko. Bokono mabe yango ebétaki bango, pela moko ebeti bango lelo. Bakokaki lisusu komikokanisa na makambo ya bikamwa te, mpamba te balingaki yango te. Liloba, Nsango-malamu, balingaki Yango te. Bokono ya lisumu esilaki kobeta bango, kasi balingáki yango.

⁷² Lisumu esepelisaka motema oyo ebongwani te. Emonanaka kitoko mpo na molimo oyo ebongwani te, kasi ezali nzela ya kufa. Eloko mosusu etikali te kaka kufa. “Lifúti ya lisumu ezali kufa,” mpe osengeli kobúka lifuti yango. Olónaki mipepe, mpe sikawa ozobúka ekúmbaki.

⁷³ Bilembo ya molimo ná mateya ya motindami oyo abúlisami na Nzambe ezalaki lisusu kosimba mitema na bango ata moke te. Bási yango bakókaki koseka bango na miso na bango, mpe koloba: “Nazali na ntina ya kokende koyoka likambo ya ndenge wana te.” Likambo yango esili kosalema lisusu! Ezali nini? Bokono ya kobósana na molimo, ezali yango mpenza. Basili kobósana ete Nzambe ná Liloba na Ye bazali ndenge moko, mpe Akoki kobongola Yango te.

⁷⁴ Soki mosakoli moko abandi mosala, na mikolo wana, mpe apesi elembo moko ya molimo, mongongo moko ya molimo, mpe apesi mongongo ya Nzambe nsima na yango, bazalaki kaka koseka Yango mpe kotiola Yango.

⁷⁵ Boyebi lisese ya kala oyo: “Bilema batámbolaka na sapáto ya nséte epai banje babángaka kotia makolo.” Yango nde likambo oyo bokono ya kobósana na molimo oyo esalaka. Esalaka ete bato bákóma na esika oyo bayókaka lisusu eloko moko te na kati na bango. Bango balingi eloko moko te ya molimo.

⁷⁶ Zua liyangani moko ya solosolo ya molimo, epai Molimo Mosanto azali kobikisa babeli mpe kosósoláká makanisi oyo ezali na mitema, mpe tiá yango katikati na mangomba nyonso, liyangani monene awa na stade oyo, mpe talá likambo oyo ekosalema. Na miníti moke, bango nyonso bakobanda kotelema mpe kobima. Bazali na ntina na yango te. Balingi kozala na eloko moko te ya kosala ná yango. Bakoyoka na bango maloba ya bato ya mayele.

⁷⁷ Kasi na oyo etali Nguya ya Yesu Klisto, ná lisekwa na Ye, mpe Molimo Mosanto, balingi kozala na eloko moko te ya

kosala na Yango, mpo ekweisaka bango. Yango epelisaka móto kati na bango na eloko oyo basengelaki koyeba. Na ntembe te, etumbu moko te, esepelisaka moko na eleko na yango. Kasi, soki okomipesa na yango, e—ebotaka mbuma ya kobongola motema. Boye, tomoni ete ntango bokono ya kobósana na molimo oyo ekangi bato, bakómaka—bakómaka na mpasi mingi. Sikawa tokómi komona ndenge moko sikawa. Sikawa nalingi ko . . .

⁷⁸ Osengeli kotalisama. Na esika moko, osengeli kolakisa. Bomoï na yo ezali kolakisa, na mpokwa oyo, epai otalisami. To otalisami kati na Klisto, to libanda na Klisto. Ozali na katikati te. Moto oyo alángwe mpe alángwe te ezalaka te. Ndeke ya mpémbe ya moindo ezalaka te. To obikisámá, to obikisámá te. Ozali mosantu to mosumuki, moko to mosusu, mpe lolenge ya ezalela na yo na molimo na oyo etali Liloba na Nzambe etalisaka yo polele ngámbo nini yo ozali. Ya solo!

⁷⁹ Liloba na Nzambe litatolami, etalisaki polele ete libatizi ya Molimo Mosanto ezali kaka ndenge yango ezalaki na Mokolo ya Pantekote to na eleko mosusu nyonso. Mpe Yesu Klisto azali ndenge moko lobi, lelo, mpe libela. Mpe lolenge na yo na ntina na Yango etalisaka soki ozali na bokono ya kobósana na molimo, to te. Ya solo. Ata soki ozali mosungi, to ata soki ozali motei, ekosala te . . . Iyo, bango mpe bazuaka yango. Boye, tomoni ete yango elekaka na moto moko kino mosusu, mpe ebétaka bipai nyonso. Sikawa tótala malamú.

⁸⁰ Sikawa, kozala Americain. Kozala Americain, nasengeli kotalisama elongo na ekólo na ngai. Sikawa bóyoka malamú. Kozala Americain, ntango nabótami awa na ekólo oyo, nakómaki mwana-mboka, mpe natalisami elongo ná ekólo oyo. Nyonso yango ezali, ngai nazali yango. Nyonso yango ezalaki, ngai nazali yango. Lokola natalisami lokola Americain, boye nasengeli kondima nsoni na yango nyonso, nkembo na yango nyonso. Nyonso oyo yango ezali, ngai nazali yango, mpamba te natalisami elongo ná yango. Amen. Nalingi bósosola yango. Natalisami lokola mwana-mboka ya America, boye nyonso oyo yango ezalaki, ngai nazali yango. Nyonso yango ezali, ngai nazali yango. Nasengeli kozala eteni na yango. Nasengeli . . . soki nazali mwana-mboka ya America, nazali eteni ya Amerika. Mpe nyonso oyo yango ezali, ngai nazali yango.

⁸¹ Nasengeli kobósana likambo oyo ata moke te. Soki nalingi kotikala mwana-mboka ya America ya solosolo, nasengeli komikanisela ete nazali oyo ekólo na ngai ezali, mpo natálisami elongo ná ekólo na ngai. Kobósana ye, to—to . . . Kobunda mpo na ye, to kokufa mpo na ye, to kobundela nyonso oyo ye abundelaka, nasengeli kobundela yango. Oyo ekólo na ngai ezali, ngai nazali yango. Oyo yango ebundelaka, ngai mpe nakobundela yango. Lokola Americain ya sembo, nakobelema kokufa mpo na yango, kobunda mpo na yango, kozua ngámbo na yango, kosala nyonso oyo esengeli. Nazali eteni na yango. Bokoki kotúmola yango te,

kozanga kotúmola ngai. Soki olobi likambo moko kotelemela yango, olobi yango kotelemela ngai, mpo nazali Americain. Koloba likambo kotelemela yo, lokola Americain, oyo balobi kotelemela ekólo oyo, balobi yango kotelemela yo, mpo ozali eteni na yango. Bóbosana yango ata moke te; na ntango obosani, boye obeli bokono ya kobósana, solo mpenza.

⁸² Mpe, bómikanisela, ozali lisusu mwana-mboka Amerika te, soki okoki kokóma eteni na yango te. Osengeli kozala bongo, oyo Amerika ezali, yo mpe osengeli kozala yango. Nasengeli kozala eteni na yango. Oyo nde ekólo na ngai, nasengeli kozala eteni na yango. Oyo yango ezali, ngai nazali yango. Bomoni, oyo yango ezalaki, ngai nazali yango. Ata ezalaki ndenge nini, nazali kaka oyo yango ezalaki.

⁸³ Kozala Americain, nakitaki na masuwa Plymouth Rock, elongo ná ye, elongo na ba-nkóko. Nasengelaki kosala yango; nazali eteni na yango. Natámbolaki na mpunda elongo ná Paul Revere, mpo na kokebisa yango na makámá na yango. Soki nazali mwana-mboka ya Amerika ya solosolo, nakitaki na masuwa na Plymouth Rock. Natámbolaki na mpunda elongo ná Paul Revere, mpo na kokebisa yango na likámá na yango. Boyebi oyo nalingi koloba sikawa?

⁸⁴ Nakatisaki ebale ya Delaware likoló na glas, ná George Washington, ná basodá na ye, makolo ngulu. Nazalaki wana, mpo natalisami elongo ná ekólo oyo. Oyo asalaki kuna, ezalaki eteni na ngai, oyo nazali kosala sikawa ezali eteni na ye. Natalisamaki elongo ná Washington, na ebale ya Delaware.

⁸⁵ Natelemaki elongo ná Stonewall Jackson, ntango makoki ya kolónza ezalaki mpenza kotelemela ye, mpe batunaki ye: “Ndenge nini okoki kotelema lokola etutú ya mabanga, na ntango oyo makoki ya kolonga ezali kotelemela yo?” Elenge mobali yango na miso ya bulé, ya nsoni-nsoni, abétaki mputulú ná sapato na ye, alobaki: “Namelaka mái te, kozanga kotonda Nzambe na Nguya-nyonso mpo na yango.” Nasengeli kotelema lokola etutú ya mabanga elongo ná ye. Natelemaki wana elongo ná Stonewall Jackson. Kozala Americain, natalisami elongo ná ye mpe kotelema ye. Kokatisáká ebale ya Delaware! Kobundáká bitumba!

⁸⁶ Natómbolaki bendele. Nazalaki elongo ná bango ntango batómbolaki bendele likoló na Guam. Nsima na basodá Americain nkóto na nkóto kopesa bomoi na bango, mpe ntango mwa etonga wana bamataki mbangu kuna mpe batómbolaki bendele, natalisamaki ntango batómbolaki bendele yango; moko na moko na biso atalisamaki. Bana-mboka nyonso ya Amerika batálisamaki elongo ná bendele oyo etélemaki kuna likoló na Guam. Ntango nayokaki ete bauti kotómbola bendele yango kuna, mpisoli etangaki na matáma na ngai. Ezalaki ngai. Ezalaki

yo. Elingi koloba biso nyonso, ntango totalisamaki kuna elongo ná yango.

⁸⁷ Nyonso yango ezali, ngai nazali yango. Nkembo na yango nyonso ezali nkembo na ngai. Nsoni na yango nyonso ezali nsoni na ngai. Soki esalaki makambo ya nsoni, na bongo nakosengela kotala ye na miso . . . koyikela nsoni na yango mpiko. Soki ezui nkembo, nazui nkembo elongo ná yango, mpo natalisami elongo ná yango. Sikawa, mpo na kotalisama, Americain asengeli koyika mpiko mpo na nsoni nyonso ya Amerika, nkembo nyonso ya Amerika, nyonso oyo yango esilá kozala. Nyonso yango ezali, to oyo yango ekozala, botalisami elongo ná yango.

⁸⁸ Sikawa, kozala Moklisto ya solo, osengeli kozala bongo. Tozali na mposa ya kobósana yango te. Nyonso oyo Ye azalaki, ngai natalisami elongo ná Ye. Natalisami elongo ná Ye.

⁸⁹ Bótala, Azali kati na ngai, mpe ngai kati na Ye. Bótala, na bongo, Moklisto nyonso oyo azali Moklisto—Moklisto ya solosolo mpenza, azalaki elongo ná Ye: “Ntango minzoto ya ntongo ezalaki koyemba elongo mpe bana na Nzambe bazalaki kogánga na esengo, liboso na kozalisama ya mokili.” Totalisamaki na kati ya misanda ezángá kufa elongo ná Nzambe, mibu milió zomi liboso mokili ésalema mpenza. Nazalaki kuna elongo ná Ye. Soki nazali na Bomoi na Seko, nazalaki kuna elongo ná Ye. Natalisamaki elongó na Ye: “Ntango minzoto ya ntongo ezalaki koyemba elongo mpe bana na Nzambe bazalaki kogánga na esengo.”

⁹⁰ Nazalaki elongo ná Ye ntango Abengaki Abraham na mibu ntu—ntuku nsambo na mitano, mpe mwasi na ye azalaki na mibu ntuku motoba na mitano, mpe ayebisaki ye ete bakobóta mwana. Nazalaki elongo ná ye ntango azuaki ngámbo ná YANGO ELOBI NKOLO: “Nakobota mwana yango.” Nazalaki elongo ná ye. Moklisto mosusu nyonso azalaki elongo ná ye. Nazalaki elongo ná ye ntango masénginiá na ye eyaki. Nazalaki elongo ná ye ntango amatáki likoló na ngomba, mpo na kopesa Yisaka lokola mbeka. Nazalaki elongo ná ye ntango mpate yango emonanaki.

⁹¹ Nazalaki elongo ná Yosefe ntango bandeko na ye baboyaki ye, mpo azalaki moto ya molimo mpe bango nyonso batikali bazalaki bato ya mosuni. Nazalaki elongo ná ye ntango ayebaki nsoni oyo asengelaki koyóka na nzela ya bandeko na ye moko. Oyo ye azalaki, ngai nazali yango. Oyo ngai nazali, ye azalaki yango. “Mpo biso nyonso tozali moko kati na Klisto Yesu.” Nazalaki elongo ná Yosefe kati ya libulu na ye, nkunda. Nazalaki elongo ná ye ntango akendeki na loboko ya mbali ya Fálo. Na ntembe te, bosengelaki kotálisama elongo ná ye.

⁹² Nazalaki elongo ná Yakobo na butu wana, ntango abundaki butu mobimba ná Mwanje. Ngai moko mpe nabundaki. Nayebi eloko oyo alekaki na yango. Boye, ngai nabundaki elongo ná

Yakobo na ntango moko oyo ye abundaki, mpo nazali ndeko na ye.

⁹³ Nazalaki elongo ná Mose ntango akendeki na Ezipito. Nazalaki elongo ná Mose na nzete epelaka móto. Soki ozali Moklisto, osili kotálisama ná ba-ndakisa ya Biblia wana. Bóbosanaka yango te! Nazalaki elongo ná Mose ntango bato nyonso babalukelaki ye. Nazalaki elongo ná Mose ntango akatisaki Mbu Motane. Ntango atómbolaki loboko mpe atámbolaki liboso, mpe Mbu Motane efungwámáki, natálisamaki kati na Klisto na ntango wana mpenza, mpe nazalaki elongo ná Mose na ngonga yango.

⁹⁴ Nyonso oyo Baklisto bazalaki, nyonso oyo bandimi bazalaki, mondimi nyonso sikawa atalisami elongo ná moto yango moko. Ézala eloko nini, osengeli kotalisama na yango. Bóbosana yango te. Soki obosani, obeli bokono ya kobósana na molimo; osili kobósana nani yo ozali.

⁹⁵ Sikawa kotalisama elongo ná ye, elongo ná Mose, ntango akátisaki mbu.

⁹⁶ Nazalaki elongo ná Eliya na mikolo ya Akába, ntango basengelaki kopona nani oyo balingaki kosalela, Nzambe to Baláme. Tozalaki elongo ná ye na Ngomba Karmel, ntango asengelaki kopona, mpo tosili kotálisama na Nzoto ya Nzambe yango moko, oyo ye asilaki kotalisama na kati. Boye, soki totalisami na kati na Nzoto yango, tosengeli komikanisela ete tozalaki wana elongo ná ye. Ezali solo.

⁹⁷ Sikawa, nazalaki elongo ná Dawidi, ntango bandeko na ye moko baboyaki ye. Nazalaki elongo ná Dawidi; ná yo mpe, soki ozali Moklisto. Osengeli kotalisama na koboyama na ye.

⁹⁸ Nazalaki elongo ná bana ya Baebele, na litumbu ya móto, ntango mó—móto ekokaki kozikisa bango te likoló na Bozali ya Moto ya minei.

⁹⁹ Nazalaki elongo ná Daniele, na libúlu ya bankosi. Natalisamaki kuna na kati, ntango Mwanje na Nkolo atalisaki ye kuna na kati.

¹⁰⁰ Na ntembe te, nazalaki mpenza elongo ná Ye na Kalvari. Nasengeli kotalisama elongo ná Ye na Kalvari. Nasengeli kozala kuna na lolenge ete natalisamaki kaka te elongo ná Ye na Kalvari, kasi nakufaki elongo ná Ye na Kalvari. Moklisto nyonso asengeli kokufa elongo ná Ye na Kalvari. Soki okufi te elongo ná Ye na Kalvari, okoki mpe kozala moko na Ye te. Nazalaki wana ntango Akufaki. Nakufaki elongo ná Ye. Na nsima nazalaki elongo ná Ye ntango Asekwaki longwa na bakufi. Nabimaki na ntongo ya Pasika elongo ná Ye, na lisekwa. Nyonso oyo Ye asálaki, ngai mpe nazalaki mpenza wana elongo ná Ye; ezalaki ndenge moko mpo na bandimi nyonso.

¹⁰¹ Sikawa nafandi elongo ná Ye na Bisika ya Likoló kati na Klisto Yesu, ná banguya nyonso ya lifélo elóngami, na nzela na Ye. Mondimi Moklisto nyonso afandaki ndenge moko, mpo osengeli kotalisama.

¹⁰² Sikawa nazali komimona lisusu, na mikolo ya nsuka oyo, elongo ná Baklisto ebele oyo bandimaka, batalisami na lotómo na Ye. “Azali ndenge moko lobi, lelo, mpe libela.” Nazali komimona, na mokolo oyo, kotalisama na lotómo na Ye. Yo mpe ozali komimona ndenge wana, kondimáká yango, kotamboláká elongo ná yango? Bótala, misala oyo Ye asalaki, Alobaki ete mondimi akosala likambo yango moko. “Misala oyo Nazali kosala, bino mpe bokosala yango.” Na bongo, bokoki kotalisama elongo ná Ye? Na bongo, ntango nsoni ekoya na Liloba, okoki koyíkela nsoni mpiko ndenge Ye asalaki, bomoni, kotalisama elongo na Ye? Ngai natálisamaki elongo ná Ye.

¹⁰³ Nazalaki elongo ná Ye na Mokolo ya Pantekote. Nazalaki elongo ná bayekoli kuna, natálisamaki elongo ná bango na libatisi ya Molimo Mosanto.

¹⁰⁴ Nazali komituna soki lingomba ezuaki te bokono ya kobósana, na lolenge ete sikawa, bamosusu kati na bango, bandimaka kutu te ete eloko moko lokola Molimo Mosanto ezalaka. Bomoni epai lingomba ekómi? Bokono mabe mpenza ya kobósana! Bomoni, basili kobósana ete ezalaki Yesu Klisto, kuna. Basili kobósana oyo Yesu Klisto azalaki. Basili kobósana. Bakanisaki ete Azalaki kaka mo—mosali mibeko, to mosakoli, to mo—moto moko malamumu. Babosanaki ete Azalaki Nzambe. Babosanaki ete Azali ndenge moko lobi, lelo, mpe libela. Mpe lingomba esili kobebe bokono mabe ya kobósana na molimo. Basili kobósana makambo nyonso oyo. Bazali lisusu kososola Yango te.

¹⁰⁵ Tosengeli kozala elongo ná bayekoli na Pantekote, kotalisama elongo ná bango. Natalisamaki elongo ná liteya ya Petelo na Mokolo ya Pantekote, na Misala mokapo ya 2. Nayokaki oyo alobaki. Nandimi oyo ye alobaki. Natósaki oyo ye alobaki. Sikawa natalisami na kati ya likambo yango moko.

¹⁰⁶ Bóbele bokono ya kobósana na molimo te. Mpamba te, boko, bokomítalisa bino moko ná eloko mosusu. Bókangama ngwi ná Liloba yango!

¹⁰⁷ Tozalaki elongo ná Lingomba ntango epesamaki etinda na Yesu Klisto, na Misala, mokapo ya 16. “Bókende na mokili mobimba, mpe bótaya Nsango-malamumu na bikelamo nyonso.” Nalingi kotalisama kuna: “Mokili mobimba, na bikelamo nyonso.” “Bilembo oyo ekolanda baoyo bakondima,” nakoki kotalisama ná yango.

¹⁰⁸ Ee, sikawa, otalisami ná yango, to osili kobela bokono ya kobósana na molimo, na lolenge ete ozali komona ete ondimaka na yo te bilembo oyo elandaka bandimi? Bomoni, soki ondimaka

na yo yango te, boye ozali na bokono ya kobósana na molimo, bomoni, osili kobósana ete Nzambe alakáki yango. Alobaki: “Bilembo oyo ekolanda baoyo bakondima.” Kobósana yango te. Okoki kobósana yango te mpe kozala Moklisto. Osengeli kotalisama elongo ná yango.

¹⁰⁹ Osengeli kotalisama elongo ná Santu Yoane mokapo ya 14, molongo ya 12. “Ye oyo akondimela Ngai, misala oyo Nazali kosala, ye mpe akosala yango.” Kobósana yango te. Soki obosani yango, na bongo osili kozua bokono ya kobósana na molimo. Osili kobósana nani yo ozali. Osili kobósana ntina ya litatoli na yo.

¹¹⁰ Ebongo likambo oyo Alobaki: “Soki boumeli kati na Ngai, mpe Liloba na Ngai kati na bino, bokoki kosenga nyonso bolingi mpe yango ekosalema mpo na bino”? Otalisami kuna, mpo na kondima ete ezali Solo? Malako 11, ntango Alobaki: “Soki olobi na ngomba oyo: ‘longwa wana,’ mpe otii ntembe te na motema na yo, kasi ondimi ete likambo oyo olobi ekokokisama, okoki kozua eloko oyo osili koloba.” Okoki kotalisama kuna, mpo na kondima ete yango ezali Solo? Soki te, na boye obandi kobéla bokono ya kobósana na molimo.

¹¹¹ Mpe—mpe obosani, obúngisi equilibre na yo ya Moklisto. Ozokoka koyeba te moto ya wapi yo ozali. Okoloba: “Nazali Metodiste. Nazali Batiste. Yango nde nayebi na ntina na yango. Nazali Pantekotiste. Nazali *boye, boye to boye*.” Keba! Ekoki kolakisa ete elembu ya bokono ezali komonana epai na yo, ete osili kozua bokono na kobósana ya molimo.

¹¹² Okoloba: “Ee, Ndeko Branham, na—nandimaka *oyo* boye, mpe na—na mpasi mpenza na...” Sikawa bozela moke. Soki Nzambe alakáki kosala makambo oyo, mpe alobaki ete ekosalema na mikolo ya nsuka, kasi bindimeli na bino ekotia yo mosika na yango, oyo wana ezali elembu malamumu, kotalisa ete nakoki komona elembu ya bokono yango epai na yo. Ezali bokono ya kobósana na molimo. Osili kobósana komitalisa elongo ná Liloba.

¹¹³ Okoloba: “Ngai nandimaka te ete babeli babikaka.” Ozali na bokono ya kobósana na molimo.

¹¹⁴ Okoloba: “Ngai nandimaka libatisi ya Molimo Mosanto te.” Bokono ya kobósana na molimo!

¹¹⁵ Okoloba: “Ngai na—nandimaka te ete Nzambe alakáki kosala makambo yango na mikolo ya nsuka.” Na bongo, oyokaki bindimeli, to malakisi moko boye, na esika ya Biblia. Obeli bokono ya kobósana ya molimo. Na bongo, oyebi na yo te esika nini ozali. Olobi ete ozali “Moklisto,” kasi ozowangana Liloba. Ezongisi yo mbala moko na bokono ya kobósana na molimo, bomoni, oyebi na yo te esika nini otelemi. Obeli bokono ya kobósana na molimo. Okoki komíkohanisa te na Makomi.

¹¹⁶ Osengeli kozala elongo ná bayekoli. Osengeli kozala elongo ná Makomi mobimba, elongo ná Lingomba ntango ezuaki etinda. Kasi, sikawa, ntango Lingomba ezuaki etínda, ete: “Bókende na mokili mobimba mpe bóteya Nsango-malamu; bilembo oyo ekolanda baoyo bakondima,” yango nde ezalaki etínda na ye. Sikawa bazali na . . . Yango nde ezalaki etínda.

¹¹⁷ Kasi basili kobéla bokono mabe yango, ya kobósana na molimo, ndenge Eva abélaki na . . . yango, kotamboláká na elanga, mokolo moko. Sikawa akómi lokola Yisraele, kobeláká bokono moko oyo, allergie uta na bilei ya likindo oyo ekopesa bino bokono ya kobósana na molimo. Soki olei bilei ya likindo, okozua allergie, na bongo, eloko ya liboso ezali ete okobela bokono ya kobósana ya makasi mpenza. Okondima eloko moko te oyo Biblia elobi.

¹¹⁸ Yango nde likambo ná lingomba lelo. Yango nde ntina oyo tokoki kozua kolamuka te lelo. Yango nde likambo ná bato lelo. Basili komelisa bango mono ya ndenge na ndenge, ná makanisi ya ndenge na ndenge oyo ekoki kobotama, na lolenge ete bayebi lisusu te oyo ezali malamau ná oyo ezali mabe. Ya solo mpenza. Azokoka koyeba lisusu Nkolo na ye te. Azokoka koyeba lisusu Liloba na Ye te. Azokoka koyeba lisusu elaka te.

¹¹⁹ Yango mpenza nde ezalaki likambo ná Yisraele, ntango Yesu akótaki na mosala. Bazalaki koyeba lisusu te, ete: “Mongondo moko akokumba zemi.” Bazalaki koyeba lisusu te ete Mose alobáká: “Yawe Nzambe na bino akotelemisa Mosakoli moko lokola Ngai.” Babélaki bokono ya kobósana na molimo.

¹²⁰ Yango mpenza nde likambo oyo lingomba ezali na yango lelo. Alobaki: “Ekosalema na mikolo ya nsuka,” ete makambo oyo ekosalema, makambo oyo tozali komona kokokisama, kasi lingomba efandi lokola ekufi mpenza nye. Ezali nini? Bokono ya kobósana na molimo. Tozali komibenga ba-Pentecotiste, kasi tokoki komitalisa te, mpe tokoki komitalisa te na kati ya Liloba, ntango Ezali koteyama na nguya ya lisekwa ya Klisto; mpe Ye awa katikati na biso, kosaláká yango, mpe kosaláká mpenza makambo oyo Alobaki ete Ekosala. Na bongo, bókeba, sistem na biso ya ba-denomination esili komema biso kino na bokono ya kobósana na molimo. Tozali komona mpasi. Toyebi te soki tozali bato ya wapi. Moko amemi mikanda na ye longwa na lingomba *oyo* kino na lingomba *mosusu*, ná lingomba *oyo*, mpe likanisi *oyo* ná likanisi *wana*. Bomoni?

¹²¹ Eloko oyo tosengeli na yango, lisusu, ezali ete Amosa mosusu ákóta na mosala, ná YANGO ELOBI NKOLO. Tokoyamba ye nde? Kaka ndenge bango basalaki. Bayambaki ye ata moke te. Bakoyamba ye te lelo. Akokaki kokota esika moko te, mpo na koteya, ezalaki mpasi mpenza. Sikawa, ezali mpenza ya solo, mpo lingomba ezali kobéla bokono ya kobósana na molimo.

¹²² Sikawa, mpo na nini? Nzambe alakáki ete na mikolo ya nsuka oyo: “Ntango Mwana na moto akomónisama,” kokokana na Luka, mokapo ya 17, “elembo oyo esalemaki na Sodoma, ekosalema lisusu.” Mpe bato bazali komona yango kosalema, kasi bamosusu na bango bazali ata kondima yango te. Bakanisaka ete ezali telepathie. Bakanisaka ete ezali molimo mabe. Ezali nini? Bazali kobéla bokono ya kobósana na molimo. Ezali mpenza bongo. Bakoki kosósola Nkolo te. “Yesu Klisto azali ndenge moko lobi, lelo, mpe libela.” Oyo Ye azalaki na eleko wana, Azali bongo sikawa.

¹²³ Kasi, oyo esalemi ezali ete, tokoki lisusu komitalisa biso moko ná Liloba te. Mpo na nini? Ye, ye ayebi te soki azali moziki to soki azali lingomba. Alingi kobengama moziki te, kasi akoki mpe kobengama lingomba te; mpamba te, kobengama lingomba, akomitalisa elongo ná Klisto. Yango epesaka ye bokono ya kobósana na molimo. Kasi alingi kobengama moziki te. Boye, ezali lingomba Pantekotiste te, lingomba Metodiste te, lingomba Batiste te; ezali nde moziki Pantekotiste, moziki Metodiste, moziki Batiste, mpo akoki komitalisa elongo ná Liloba te. Mpe ntango Liloba ezali kotalisama polele, bango bazali kaka kondima Yango te. Ezali maláli, bokono ya kobósana na molimo. Bakoki komitalisa bango moko te; bayebi esika nini bango bazalaka te. Ezali solo.

¹²⁴ Ekómi mpenza lokola kosangisa eloko moko boye. Ndenge nalobá mbala mingi: “Nakanisaka ntango nyonso na ntina na moko na banyama ya zoba koleka oyo namóná ezali mbalata-mpunda.” Bomoni, azali nyama oyo esangisami. Bomoni, mama na ye azalaki mpunda, papa na ye azalaki mbalata, kasi ye ayebaka te soki azali nyama nini. Mpe eloko ya liboso boyebi, bo—bo—bo—bokoki kosangisa ye mpo na kozua mbalata, na nsima. . . to mpo na kozua mbalata-mpunda, kasi mbalata-mpunda ekoki lisusu kobotana te. Bomoni, ebotanaka te. Okoki koteya ye eloko moko te. Azali na motó makasi. Bokokoka ata moke te koloba eloko moko. . . Okoki kotelemisa matoi milai mpe minene wana. Mpe akozela kino mokolo ya molai koleka na bomoi na ye, liboso ákufa, mpo na kobeta yo kisambéti. Esili. Azelaka ntango nyonso eloko moko mpo átombokela yo, soki akoki kosala yango.

¹²⁵ Mpe yango esalaka ete nákanisa na ntina na Baklisto mingi ya maloba, oyo basangísámá. Basili kosangisa lingomba na lolenge ete babéli bokono ya kobósana na molimo. Bakoki lisusu kobotana eloko moko te.

¹²⁶ Balobelaka masangu oyo basangísá. Masángu oyo basangísá ezali eloko moko te. Ezali eloko ya mabe koleka oyo otikálá kotia na monoko na yo, eloko nyonso oyo basangísá. Yango nde ntina oyo bozuaka mwa milóna oyo ekoméli na ndako, ná biloko basangísá, mpe bomwangiselaka yango nkisi, bobongísaka

yango mpe bobémbelisaka yango. Mpo na nini? Mpo ekokaka komibatela na ba-nyama mike-mike te.

¹²⁷ Kasi eloko oyo ya solosolo mpenza bozali na ntina ya komwangisa nkisi likoló na ye te. Azali na Nguya na kati na yango moko, mpo na komibatela na ba-nyama mike-mike. Yango nde oyo esengeli mpo na kobatela ba-nyama mike-mike ya kozanga kondima mosika na moto oyo azali na Molimo ya solosolo mpenza.

¹²⁸ Soki ozui mobange ya mbalata-mpunda, mpe obandi kosolola na ye, koloba: “Tala, nalingi ete ósala *boye ná boye*.”

¹²⁹ Akofanda wana, akolela: “Woo! Woo! Woo!” Na matozi minene wana ezomatáká-kokitáká. Namóná ba—Baklisto mingi kosala ndenge wana, oyo bamíbengaka bongo.

¹³⁰ Okoloba: “Yesu Klisto ndenge moko lobi, mpe libela. Bilembo oyo ekolanda baoyo bakondima.”

¹³¹ “Woo? Nandimaka ete mikolo ya bikamwa esilá koleká. Woo? Woo? Woo?” Bomoni, ayebi na ye te eloko nini andimaka mpenza. Ayebi eloko moko te. Ayebi epai aútá te; ayebi epai azali kokende te. Azali na bokono ya kobósana ya mpunda. Ayebi epai aútí te, mpe akoki kokende mosika koleka te.

¹³² Kasi ngai nasepelaka na mpunda ya solosolo. Oh, azalaka na bopolo. Okoki kosolola na ye. Ayebi nani papa na ye azalaki, nani mama na ye azalaki, nani nkoko na ye ya mobali mpe nkoko na ye ya mwasi bazalaki. Azali na mikanda oyo etalisaka ete azali ya solosolo, kotalisa esika oyo ye aútá.

¹³³ Mpe nalingaka Moklisto oyo ya solosolo, oyo akoki kozonga mpenza na Liloba na Nzambe, kino na Mokolo ya Pantekote, mpe komitalisa bango moko kuna elongo ná basantu, epai Nguya ya Molimo Mosanto ekitaki likoló na bango. Oyo wana nde Moklisto ya solosolo. Ayebi epai aútá. Amitalisaka te elongo ná ba-Methodiste, ba-Batsite, to eloko mosusu. Amitalisaka kati na Liloba na Nzambe. Ayebi mpenza esika oyo atelemi. Makila ya bokonzi ya Tata na ye ezali konana na kati na ye; Makila ya Yesu Klisto. Ayebi eloko oyo Yango esalaka! Andimaka Liloba moko na moko. Nzambe asalaka na nzela na ye mpe atátolaka yango na bilembo oyo Alakaki ete ekolanda bango. Azali na bokono ya kobósana na molimo te. Azali oyo ya solosolo. Nasepelaka na yango.

¹³⁴ Kasi lelo lingomba ezali na bokono mabe ya kobósana na molimo. Eyebi te esika nini yango ezalaka. Ebosani nyonso Wana, ebosani makambo nyonso oyo esálaka ete ézala Lingomba.

¹³⁵ Eloko nini esálá ete tózala na bozui ndenge tozali boye? Ekómi lisusu na esika ya Laodikia, ezóngi na esika ya bozui lokola Yisraele azalaki na yango. Ntango ezalaki mobólá mpe esengelaki kotalela Nzambe na makambo nyonso oyo ekokaki kosala, ná nyonso oyo ezalaki na yango, ezalaki kotalela Nzambe;

na bongo, Nzambe azalaki elongo ná yango, ezalaki ya molimo, mpe ezalaki kokende liboso. Kasi ntango ekómaki na bozui, tálá kikambo oyo esalemaki: bingumba na bango etongamaki, mpe basi na bango bazalaki lisusu na bomoto te, mibali na bango bapesaki nzela na yango, bateyi na bango balongolaki bipekiseló, mpe batiolaki basakoli. Mpe nde lolenge ya kozala oyo bakoti na yango. Eloko oyo esalaki yango, ezalaki ete babosanaki epai mapamboli yango ezalaki kouta.

¹³⁶ Bino ba-Methodiste, ná bino ba-Batiste, mpe bino ba-Presbiterien! Bino ba-Methodiste bokoki komikanisela John Wesley. Bino ba-Batiste! John Smith alélaki mpo na mpasi ya bato na lolenge ete mwasi na ye asengelaki komema ye na mesa, miso na ye evimbaki mpe ekangamaki, nsima na kolela mpe kobondela butu mobimba. Likambo yango nini?

¹³⁷ John Wesley alobaki ete moko na makambo minene... Nabanzi ete ezalaki moko na ba-tata ya ba-Methodiste ya ebandeli nde alobaki: “Nsoni ya bana basi ya lingomba Methodiste, ezalaki mpo babandaki kokóma na makambo ya mokili mingi, na lolenge ete bakómaki koláta mpete na misapi.” Alingaki koloba nini sikawa, ná ba-kupé bakomi kolata?

¹³⁸ Likambo nini esalemaki? Bokono ya kobósana na molimo. Ezali yango mpenza, bobósani epai boútá. Bozali na makambo nyonso oyo mpo likabo, bolamu ya Nzambe nde esali yango epai na bino.

¹³⁹ Bokanisi ete ezali likambo ya kokamwa? Elongobani mpenza ná Molimo ya Yesu Klisto, na lisakoli. Na Emoniseli, mokapo ya 3, elobi: “Lokola olobi: ‘Nazali mozui, nazali na bosenga na eloko moko te,’ mpe oyebi te ete ozali mobola, mokufi miso, moto na bolozí, moto na mawa, bolumbu, kasi oyebi yango te” Bomoni, ayebi yango te! Ezali nini? Bokono ya kobósana na molimo. Bayebi yango te.

¹⁴⁰ Mangomba ekómi na—na mbongo sikawa. Ata losambo moko te, tóloba, na ekólo mobimba, denomination moko te oyo ezangi kotongama na motuya ya ba-milió na ba-milió ya ba-dollar. Bazali kotonga ba-ndako ya ba-milió na ba-milió ya ba-dollar ná biloko mosusu, mpe koteyaka ete Boyei ya Nkolo ekómi pene. “‘Bazui,’ mpe bazali koloba: ‘Nazali na bosenga ya eloko moko te.’” Ná batei oyo batángá mingi koleka, bayebi likindo mingi koleka ndenge batikálá koyeba. Mpe bakómi na ba-ndako ya minene koleka, ná bisika ya malamú koleka na kati ya engumba. Bakómi na makoki ya kosala nyonso oyo balingi. Na nsima basalaki nini? Bazuaki bokono ya kobósana na molimo mpe babosani ete Nzambe nde asálaki yango mpo na bango, kaka lokola Yisraele.

¹⁴¹ Mpe Biblia esakolaki, Yesu Klisto atindaki mwanje na Ye epai ya Yoane mpe alobaki, ete eleko ya lingomba ya nsuka oyo ekozala na bokono ya kobósana na molimo. Bakómaki

“bato na bolozi,” bómikanisela. Bakanisaka ete bazali monene. Bakanisaka ete bazali na eloko. Kasi Ye alobaki ete bazalaki “bato na mawa, bato na bolozi, babola, bakufi miso, bolumbu, kasi bayebaki yango te.” Mpe nzela ya koyebisa bango ezali te.

¹⁴² Sikawa, soki mobali moko azalaki awa na balabala, moto na nsoni, to mwasi, bolumbu, na balabala, mokufi miso, elingaki kozala lolenge moko ya mawa mingi kozala na lolenge wana. Kasi nde, soki bazalaki na lisosoli na bango malamumu, soki bayebaki oyo bango bazalaki, ete bazalaki bato, mpe basengeli koláta bilamba; ee, olingaki kokende kuna; bazali—bazali bato, basengeli komitalisa elongo ná bato; mpe kuna, “bato na bolozi, bato na mawa, bakufi miso, mpe bolumbu.” Mpe yo okeyi epai na ye, mpe olobi: “Ndeko, ozali bolumbu.”

¹⁴³ “Sikawa, tala! Ngai nazali Molakisi *Songolo!* Makambo na ngai etali yo te. Yoka, nazali moto ya etonga *Songolo-pakala!* Yo ozali na ntina ya koyebisa ngai eloko moko te, yo motúntuki oyo!” [Maloba mazangi na bande—Mok.]

¹⁴⁴ Yebisa bango: “Ezali mabe mpo na mobali kosala bongo, mpe mpo na bato kosala makambo oyo bazali kosala.”

¹⁴⁵ Mpe bakoyebisa yo ete motei na bango afungwámá. Bomoni? Ezali eloko nini? Ezali, basili kobósana mibeko ya Nkolo Yesu. Na bongo, tika ete Ákita mpo na kosala bilembo ná bikamwa oyo Alobaki ete Akosala, balingi na bango kondima yango te. Ezali bokono ya kobósana na molimo. Bomoni, basili kobósana! Mpe bazali bolumbu, kasi bayebi yango te, mpe bazali kosósola yango te.

¹⁴⁶ Bamilobelaka: “Lokola nasambelaka kaka, yango nde nyonso oyo esengeli.” Oh, ndeko, epai na Nzambe, ezali kaka lokola kozala moto ya Franc-maçon to eloko nini mosusu, to lisanga mosusu nyonso. Kozala moto ya lingomba, elingi koloba eloko moko te epai na Nzambe.

¹⁴⁷ Bosengeli kozala bana mibali mpe bana basi ya Nzambe. Bosengeli kobótama na Nzambe, mpe Nzambe azali Liloba. Ntango nakómaki eteni ya tata na ngai, nakómaki tata na ngai mobimba. Soki okómi eteni ya Nzambe, okómi Nzambe, na mobimba. Liloba na Ye mobimba, ondimaka Yango na mobimba.

Bokono ya kobósana na molimo!

¹⁴⁸ Bongo soki oyebaki te ete nkombo na yo ezali oyo yango ezali? Mpe soki ozali, outi na libota moko ya malamumu, oyo nazolikya ezali bongo, soki outi na libota moko ya bato malamumu, mpe elingaki kozala ndenge nini soki obósanaki nkombo na yo ya libota, mpe obimi awa mpo na kobika bomoi ya nsoni? Bakoloba: “Yo nkombo na yo Jones te,” to ézala nkombo nini. “Ee, nayebi te nani ngai nazali.” Bomoni? Malamumu, bomoni, wana ezali likambo ya nsomo ya kozala bongo, lolenge moko ya nsomo ya kokoma na yango.

149 Ee, Yango mpenza nde esika lingomba esili kokóma. Esengelaki kozala etaliseli ya Yesu Klisto. Kasi esili kobósana yango, mpo ezui, ekótisi, bindimeli ná ba-denominations kati na yango, mpo basili kondima yango na esika ya Liloba. “Mpe bazali bolumbu, bakufi miso, bato na mawa, kasi bayebi yango te,” mpe nzela ya koyebisa bango ezali te.

150 Ntango mosusu nakozaláká lisusu na Birmingham te, kasi oyo ezali mbala moko oyo bakoyoka yango. Bomoni? Bomoni? Ya solo. Nazali kaka. . . Nazali na mokumba na eloko mosusu te bobele kolóna Momboto. Nzambe nde akambaka Yango na mabelé oyo epai Yango esengeli kokende.

151 Babósani, iyo, babósani Liloba ya elaka. Babosani. Yisraele ekómaki na lolenge wana mpenza ntango Yesu ayaki. Ebósanaki. Batálaki, oh, bazalaki koloba ete bazalaki kondima ete Masiya moko akoya. Kasi ntango Masiya yango ayaki mpe amitalisaki Ye moko na nzela ya Liloba, bango bakómaki na mimesano mingi na lolenge ete bakomisaki Liloba na Nzambe mpamba.

152 Mpe Yesu alakaki, kaka liboso na ntango ya nsuka: “Ndenge esalemaki na Sodoma, ekosalema mpe bongo.” Mpe ekotalisama polele, kasi bato bakangami mpenza na mimesano kino bakomisi elaka ya Nzambe mpamba, na mimesano na bango. Bokono ya kobósana na molimo! Bokono ya kobósana na molimo, nde mpenza oyo yango ezali. Bomoni, basili kobósana makambo oyo.

153 “Oh, nazali mondimi ya eloko *oyo*. Na—nasalaki *boye*. Nabinaki na Molimo. Nasalaki *boye*.” Ee, oh, la la, la la, oyo wana etali yango te, ata moke te.

154 Ndenge nini okoki kozala Moklisto bongo ówangana Liloba? Okoki kosala yango te. Nzambe azali Liloba. Soki Liloba ezali kati na yo, yo ná Liloba bokómi ndenge moko. Nyonso oyo Liloba ezali, yo ozali yango. Amen. Soki nazali kobika na ekeke oyo, oyo eteni ya Liloba oyo esili kolaka mpo na ekeke oyo, ngai nasengeli kozala yango. Soki nalingi kozala Moklisto, nasengeli kotalisama elongo ná nyonso oyo Biblia etáyaka mpe ebundelaka.

155 Aleluya! Bokobenga ngai motúntuki, ata bongo, mpe nazali komiyoka mpenza mosambeli sika-sikawa. Iyo, misie.

156 Nasengeli kotalisama elongo ná likambo nyonso oyo Biblia yango esengi. Mpe Epesaka bosengi yango, mpe, soki nabétami te na bokono ya kobósana na molimo ya mikolo oyo, nakozala mpe nakoki kotalisama elongo ná Yango. Soki nawángani Yango, boye nazali na bokono ya kobósana na molimo; likambo moko esili kosálema, nasili kondima endimeli to malakisi moko, to lingomba moko to lisanga moko ya bato. “Nakoki kosala yango te,” nzokande Liloba eyei mpe ezali komitalisa Yango moko.

157 Yango nde ntina oyo bayébaki Yesu te. “Oh,” balobaka, “ee, moto oyo azali mosantu, ná sánzó mosantu na biso, mosantu na biso *boye*.”

158 Kasi Yesu alobaki: “Bouti na tata na bino, zabolo, mpe misala na ye nde bozali kosala.”

159 Boyebi ete Kaina mpe apesaki mbeka ya malamú? Azalaki sembo, atongáki etumbelo, afúkamaki mpe akúmbamelaki, mpe apésaki mbeka, mpe asámbelaki Nzambe. Mpe soki, Nzambe, nde nyonso oyo Nzambe aséngaka, ete ózala mondimi ya lingomba mpe ózala na etumbelo, mpe ófutaka moko na zomi na yo, ókendeke na losambo, mpe óbikaka bomoi ya malamú; soki yango nde nyonso oyo Aséngaka, Azalaki sembo te ndenge Akweisaki Kaina, mpamba te ye mpe asalaki likambo yango moko. Iyo, misie. Ezali mpenza bongo.

160 Kasi *religion* elingi koloba “ezipelo,” mpe okoki kozipama na misala malamú na yo moko te. Ezali na eloko bobele moko oyo Nzambe akondima, mpe yango ezali Makila na Yesu Klisto. Yango nde ezipelo bobele moko. Libanda na Yango, soki olobi: “Tósa bindimeli,” bokono ya kobósana na molimo! Yango nde likambo oyo esalemaki.

161 Sikawa bótala, basili kobósana Liloba na bango. Babósanaki Biblia. Babósanaki elaka. Bazali komeka kobika na mwa bongengi ya oyo ba-Methodiste bazalaki, ya oyo ba-Batiste bazalaki, ya oyo moto mosusu azalaki. Elaka ya lelo yango oyo, mpe Nzambe alobi Yango na Liloba na Ye mobimba, mpe Azali kotatola lisusu mpe kotalisa polele ete Ezali bongo, kasi bazali kaka kondima Yango te. Bokono ya kobósana na molimo! Ezali mpenza bongo. Babeli mpenza, mpenza bokono ya kobósana, bandimaka na bango mpenza Yango ata moke te.

162 Sodá moko ya France. Babetelaki ngai mwa lisolo moko; liboso tósilisa. Nayebaki ata te ete ngonga eleki boye, mpe natikali na nkasa pene na zomi ya makambo nakomaki awa; tokokóba na yango mokolo mosusu. Bótala, sodá moko ya France. Bayambáki basodá mingi oyo bautaki na mampinga, mpe bazalaki na bokono yango ya kobósana. Eutaka na botutani ya motema, na etumba. Bazalaki na manáka moko, mpe ba—balonaki ete bato oyo bamonaki naino balingami na bango te bábenga mpo báya kotala soki bakokaki komona bilenge mibali yango. Elikia ezalaki te mpo na bango, ntango mosusu bayebaki kaka moko to mibale, kati na bango. Na bongo bazuaki baoyo batikali, balingaki komema bango na lopitalo ya sanatorium, epai basengelaki kofanda bomoi na bango nyonso etikali.

163 Bazalaki komata ngomba, engunduka ezalaki komata ná bango; mpe batelemaki na gare moko, babimisaki bilenge mibali yango mpo bányolisa makolo. Babáteli bamatáki likoló na ngomba, mpo na kosénzela bango, likoló na bokono ya kobósana, ee, ba—basengelaki kosénzéla bango.

164 Boye, balandelaki elenge mobali moko wana, abimaki mpe abandaki kotala ebombelo ya mai oyo ezalaki wana, atámbwisaki miso na ngomba mobimba. Apangusaki elongi na

ye, mpe atálaki malamú. Atálaki lisusu, mpe amónaki ebombelo ya mai yango. Atámbwisaki miso na gare yango, mpe abandaki kotámbola. Na esika mobateli ápekisa ye, alandaki ye.

¹⁶⁵ Amatáki likoló na ngomba, akitaki na mwa nzela moko, akátisaki na loboko ya mobali, amatáki likoló na mwa ngomba mosusu, mpe akómaki na mwa ndako moko ya banzete. Atálaki. Mobange mobali moko abimaki na ekuke, ná lingenda na loboko, abimaki mpe ayambaki ye. Alobaki: “Mwana na ngai, nayebaki ete okozonga. Bayebisaki ngai ete okúfaki, kasi ngai nayebaki ete okozonga.” Mpe makanisi ya elenge mobali yango ezóngaki. Bokono na ye ya kobósana etikaki ye. Akokaki koyeba nani oyo ye azalaki. Ayebaki ete oyo wana azalaki tata na ye.

¹⁶⁶ Oh, sodá ya Ekulusu, oyo atutámá makasi na motema ná boyékoli mingi, botutani mingi na motema ya ba-denomination ná bindimeli, mpe makambo ya mokili, mpo na nini te kobandana pembeni mwa moke mpo na kobwaka miso na Biblia? Ntango mosusu koyengayenga zingazinga, mpe ntango mosusu okomóna ete otalisami awa na kati ya Liloba, lokola mondimi, moko na mikolo oyo. Ntango mosusu oyebi Ye te. Ntango mosusu makanisi na yo ekozonga, lokola mwana ya kilikili asalaki, mpe okomiyeba. Ntango mosusu okomona kotalisama na yo na Maloba ya Nzambe.

¹⁶⁷ Moto moko alobaki, mokolo mosusu, kala mingi te, alobaki: “Kasi, Ndeko Branham, tala ndenge biso ba-Pantekotiste tozali ná ba-losambo ya kitoko. Ee, biso, biso tozali na batei oyo bayékólá.”

¹⁶⁸ Bóyoka, ntango mobali abálaka mwasi, atiáka motema na kitoko na ye te. Te. Atiáka motema na bosembo ya ndai na ye, liloba na ye. Atiáka motema na kitoko na ye te. Atiáka motema na bosembo na ye.

¹⁶⁹ Ezalaka mpe bongo ntango obálani ná Nzambe, okotia motema na losambo monene mpe kitoko oyo okoki kotonga te, kasi na elaka oyo Yesu Klisto apesaki, ete: “Nazali ndenge moko lobi, lelo mpe libela.” Bondimi yango?

Tógumba mitó mwa moke.

¹⁷⁰ Nazali komituna, na mpokwa oyo, awa na kati ya ndako oyo, epai wapi bato bafandi, epai wapi mibali ná basi oyo bazali ya Seko, bato oyo bazali kokende na Seko, mpe boyebi ete mokolo moko to mosusu bosengeli kokutana na Nzambe. Nazali komituna soki bozuaki mwa mopepe moke ya bokono ya kobósana wana, mpe olingaki . . . Osilaki kotalisama na eloko ya mabe, mpe oko—okolinga kobwaka miso nzinganzinga, na mpokwa oyo, mpe koyeba soki okoki te kotalisama kati na Klisto Yesu? Okolinga kotombola loboko, koloba: “Bóndela mpo na ngai, Ndeko Branham, na—nalingi kotalisama lokola Moklisto ya solosolo, mondimi ya solosolo.” Nzambe ápambola

yo. Nzambe ápambola yo. Apambola yo! Oh, iyo, bipai nyonso. Nkolo Nzambe apambola bino.

¹⁷¹ Moto moko kuna na balkó, loba: “Ndeko, nandimi mpenza ete ezali Solo. Nandimi ete lokola Baklisto, tozalaka lisusu Baklisto te lokola baoyo ya mibu ya kala.”

¹⁷² Bongo bino ba-Pantekotiste, ntango bamama ná batata na bino bazaláká kotelema awa na balabala, mpe kobeta tambourin ya kala. Mpe mama na bino, ndenge asengelaki. . . asengelaki kolemba, mpe kosala makasi mpo na bino bana mike. Mbala mosusu bosengelaki kozanga bilamba, ná nyonso mosusu, kasi papa ná mama bakangamaki sémbó na Ntina yango, mpo na konétola Klisto.

¹⁷³ Bótala makambo oyo bino ba-Pantekotiste bosalaki. Eleki mibu ntuku mitano, bobimaki na ebongiseli. Yango nde ekomisi bino ba-Pantekotiste, bokabwanaki na bazangi kondima. “Kasi lokola ngulu na potopóto na yango, mpe mbwa na bisánzi na yango,” bosili kozónza mpe kosala makambo ndenge moko, bosalaki kaka bosoto moko oyo bobimaki na yango. Likambo yango nini? Bokono ya kobósana na molimo ekoti katikati na bato. Bokómi na bindimeli ná mikanda ya ba-denomination na bino sikawa, mpe bokómi ná mosanda moko ná bamosusu, bolingi kozala elongo ná bamosusu. Bopesi basi na bino ndingisa ya kokáta súki na bango, ya kopakola-pakola. Bino, bozali kopesa bango ndingisa ya kosala makambo nyonso oyo, kopesa ndingisa na likambo nyonso oyo na—na balosambo. Ezali nini? Bokono ya kobósana na molimo.

¹⁷⁴ Bongo, na mbala moko, ntango Nzambe abandi koya kotala bato, na nsima likambo nini esalemi? Bokoki koyamba yango te. Bomoni, bobeli makasi mpenza bokono ya kobósana, bomoni, eloko bobele moko oyo boyókaka. Bomoni te ete bosengeli kobima na bindimeli yango mwa moke, mpe kozua Biblia, mpo na komona eloko nini Moklisto asengeli kotalisama na yango? “Bilembo oyo ekolanda baoyo bakondima!”

¹⁷⁵ Na Misala, Petelo alobaki: “Bóbongola mitema, moko na moko na bino, mpe bózua libatizi na Nkombo na Yesu Klisto mpo na bolimbisi ya masumu, mpe bokozua likabo ya Molimo Mosanto; mpo elaka yango ezali mpo na bino, ná bana na bino, ná baoyo bazali mosika, baoyo nyonso Nkolo Nzambe na biso akobenga.” Soki bayebisi yo ete Ézali bongo te, na bongo mokengeli na bino azali na bokono mabe ya kobósana na molimo. Akoki komitalisa elongo ná Lingomba yango te; ebongiseli te; Lingomba, Nzoto ya Klisto oyo emonanaka te.

¹⁷⁶ Sikawa Molimo Mosanto azali awa. Azali awa mpo na kosala mpenza eloko oyo Alakaki kosala. Sikawa, wana bozali awa, wana bogumbi mitó, bókoba kaka kobondela. Tika ete Molimo Mosanto Ye moko áloba. Mpe bokomona soki oyo. . . Moto nyonso ayebi yango, oyo elaka ezali mpo na lelo oyo. Sikawa bino baoyo

bozali na bosenga, na mpokwa oyo, bino, mingi kati na bino botómbolaki maboko. Liboso bósala yango. . .

177 Nazali komituna, wana tozali awa mpe tozali mpenza kobondela mpo na babeli, nazali komituna soki bokoki kokabwana na kozanga kondima wana, ná denomination wana, ná endimeli oyo eyebisaka yo ete makambo oyo ezali solo te, ná moto oyo ayebisaka yo ete Ezali ya zabolo. Ntango basalaka bongo: “Bakolimbisama ata moke te, na ekeke oyo to na ekeke ekoya.” Bongo soki Oyo ezali Solo? Bókanisa naino, bongo soki Ezali bongo, na bongo, ozali wapi? Bomoni, ozali na ntina ya koloba yango te; ndima yango kaka na motema na yo. Mpe bato bazali awa baoyo bandimaka yango. Nazalaki awa, na mpokwa mibale oyo eleki, eloko moko ezalaki kotungisa ngai, mpenza, oh la la, nazalaki komipekisa mpe komiswa lolemo, mpo náloba yango na miso ya bato te.

178 Mpe mikanisela, moninga, etali yo ná Nzambe. Bongo soki ezali lokuta, likambo oyo yo ozali kokanisa? Oyebi oyo ekosalema, okolimbisamáká te mpo na yango. Bokono ya kobósana na molimo, okokende sémba kino na kufa na yo ya Seko, kozanga kondima. “Ye oyo andimaka te asili kokweisama!”

179 Sikawa bóndela mpo na bokono na yo, loba: “Nkolo Yesu, Olakáki. Ngai. . .”

Ntango mosusu bapaya bazali awa, baoyo bayá naino awa te liboso.

180 Yesu alakáki ete: “Ndenge esálemaki,” nakozua Likomi moko, “na ntango ya Lota,” ntango Nzambe atalisamaki na nzoto ya mosuni; mpe bato, Abraham, etónga oyo eponámá, etónga oyo ebéngámi kobima. Mpe nkombo ya Abram ebongwanaki na Abraham, na nsima amonaki Liloba kokóma mosuni, mpe Esósolaki makanisi oyo ezalaki na motema ya Sara.

181 Mpe ntango Momboto Mokonzi ya Abraham eyaki, yango nde eloko oyo Asalaki, kasi babengaki Ye “molimo mabe”.

182 Alobaki: “Sikawa, ntango Molimo Mosanto akoya, Akosala ndenge moko.” Alobaki: “Sikawa bolimbisi ezali ntango bobengi Ngai bongo, kasi, ntango bokoloba mabe mpo na Molimo Mosanto, bolimbisi ezali te.”

183 Sikawa, tika ete Ye, na Nguya na Ye, áya na eyanganelo oyo ya bato, ózala esika nini, ná lisosoli na Ye ya molimo, mpo na kotalisa ete Azali Liloba. Na bongo soki moto moko azali awa, oyo azali na bokono ya kobósana, ete bázanga. . . bázanga ntina ya komilongisa, liboso tóbenga bato na etumbelo.

184 Tika ete Nkolo Nzambe ázunga. Sikawa wana bogumbi mitó, bóbondela na limemia.

185 Bomoni, mwasi moko afandi awa liboso na ngai. Atomboli maboko na elongi na ye. Azali na bokono na mokuwa ya

mokongo. Azalaka mpe na motema likoló-likoló. Azali na bokono ya estomá. Mpe afandi awa liboso na ngai sikawa. Mpo áyeba yango, afandaka na etúka oyo te. Auti na engumba oyo ebengami Macon. Iyo. Ondimi ete Nzambe akoki koyebisa ngai nkombo na yo? Nkombo na yo Mademoiselle Ayers. Soki ezali ya solo, tómbola loboko. Oyebi ngai te. Ezali ya solo, boye te? Sikawa mpasi na yo esili. Yesu Klisto; osimbaki elamba na Ye. Abikisi yo. Sikawa ndima yango kaka.

¹⁸⁶ Mobali moko afandi na nsuka ya ndako. Azali koluka libatisi ya Molimo Mosanto. Azali na mposa ya libatisi na Molimo. Atelemi awa liboso na ngai. Ye mpe afandaka awa te. Auti na Caroline, na Charlotte. Nkombo na ye Lepoe. Ndima na motema mobimba, mpe Nzambe akotondisa yo na Molimo Mosanto, ndeko na—na ngai, soki ondimi yango.

¹⁸⁷ Awa, na loboko na ngai ya mobali, mo—mobali moko azali awa, ná mwasi na ye, bafandi mpenza liboso na ngai awa. Bazali babálani oyo bakóli, na loboko na ngai ya mobali. Mwasi azali na mpasi na colon. Mobali na ye azali na mpasi ya motema. Bafandaka awa te. Bauti na Tennessee. M. ná Mme Thomas, soki bondimi na motema mobimba, bótombola maboko mpe bokoki koyamba lobiko na bino. Yesu Klisto abikisi bino. Yango mpenza nde eloko oyo Alakaki kosala. Kasi namóná bango naino te na bomoi na ngai.

Bokono ya kobósana na molimo!

¹⁸⁸ Yesu alobaki: “Misala oyo Nazali kosala, bino mpe bokosala yango. Nsima na ntango moke, bamokili bakomona Ngai lisusu te; kasi bino bokomona Ngai, mpo ete Ngai,” likitana bomei, “nakozala elongo na bino, ata na kati na bino, kino na nsuka ya mokili.” “Yesu Klisto, ndenge moko lobi, lelo, pe libela.”

¹⁸⁹ Sikawa, mpo na mibali ná basi oyo bazali awa, baoyo bozali na eloko moko oyo ezali kotambola te, oyo boyebi mpenza te ndenge nini. . . Bino, bolingi kondima, kasi bozali mpenza kokoka te, mpe bolingi ete tóbondela mpo na bino, bolingi koyamba Ye wana bozali Liboso na Ye, bokolinga koya kotelema awa pembeni na ngai, mpo nákoka kobóndela mpe kotiéla bino maboko. Soki bokolinga kopusana awa sikawa, bino baoyo bozali na bokono yango, bokono ya kobósana na molimo, mpe bokolinga ete tóbondela mpo na bino, mpo bókangolama na yango. Soki ozali te mo—mondimi te, kasi olingi ete tóbondela mpo na yo, yaka kotelema awa. Nzambe ápambola yo, elenge mobali. Moto mosusu akoya? Nzambe ápambola yo, madame. Yaka. Nzambe ápambola yo, mama moke. Moto mosusu akoya? Yaka kotelema awa, sikawa.

¹⁹⁰ Bokono ya kobósana na molimo, nalingi kobetama ná yango te. Nzambe ábatela ngai. Ná—nákufa na ngai liwa ya—ya nyonso, kasi nákufa ata moke te liwa wana lokola mozangi kondima.

191 Bóya, koyamba Ye sikawa. Bokolinga kosala yango te? Bóya, mpe bókita longwa na balkó, baninga. Ezali bobele mwa matambe moke kino awa, mpe ekoki kosala bokeseni kati na liwa ná Bomoi, mpo na bino.

192 Bótala, nakoki kosalisa Klisto eloko moko te. Klisto azali na ntina ya kosala eloko mosusu te, bobele eloko moko: Asengeli kokokisa Liloba na Ye. Asengeli kosala yango mpo na kozala Klisto, mpo na kozala Nzambe. Asengeli kokokisa Liloba na Ye.

193 Sikawa bómikanisela, soki ondimisami mpenza te na makambo obíkelaka, mpo na nini te kokita sikawa. Soki ozali bobele moto ya denomination, soki ozali nkoko ya Pantekotiste moko, Nzambe azalaka na bankóko te. Azalaka na bana mibali ná bana basi, kasi bankóko ya mibali ná ya basi te. Bomoni? Nzambe azalaka na bango te. Azalaka kaka na bana mibali ná bana bási, mpe yo oyebi ete ezali bongo te mpo na yo.

194 Ntango mosusu osilá koloba minoko ya sika, ntango mosusu osilá kobíná, ntango mosusu osilá kosálá nyonso *oyo*. Ezali mabe te. Naboyi yango ata moke te. Kasi ata bongo, soki ozali naino na bokono wana ya kobósana na molimo, kita na nsé, mpe yáka kotelema awa. Tóbondela mpo na yango. Olobi nini? Mondimi ya lingomba, ozali kaka mo—mondimi ya lingomba ya nkombo, mpo na nini te koya awa mpo tókabwana na yango sika-sikawa?

195 Naboyi kolongwa awa na Birmingham, mpe koyeba ete mokolo moko, ntango Kosambisama ekobanda, bongo násengela na ntango wana kotelema liboso na bino. . . Bómikanisela, nakokutana na bino lisusu. Soki nakokutana na bino lisusu awa te mpo na likambo oyo, to nakokutana na bino na Kosambisama mpe nasengeli kosamba mpo na makambo oyo nalobi na mpokwa oyo.

196 Sikawa bóyoka. Bóbongola mitema, baninga! Bóbongola mitema, bóbima na eloko yango. Bóbima kuna. Bóya sikawa.

197 Esengelaki kosala ete mwasi nyonso oyo akátá súki na ekólo oyo, to na esika oyo, ápusana awa sikawa. Ezali mpenza ya solo. Elakisi ete bozali na ngolu oyo esengeli te mpo na koloba mpenza ete: “Na—na—na—nalingi, nalingi kotika súki na ngai ékóla, Ndeko Branham.” Esengelaki. . . “Nazali na. . . Ee, nazangi ngolu ya kosala yango.”

Ee, okoloba: “Ezali mpenza na ntina ná likambo yango?”

198 Eumeli te awa, motei monene moko ya solo ayaki epai na ngai, mpe alobaki: “Nalingi kotiela yo maboko, Ndeko Branham.” Alobaki: “Bato nyonso bazuaka yo lokola mosakoli.”

Nalobaki: “Ngai nalobá ata moke te ete nazali mosakoli.”

199 Alobaki: “Kasi bato bazuaka yo bongo. Yo ozalaka ntango nyonso kokweisa basi, na ntina na kolatáká ba-kupé,” mpe—mpe, oh, mobali moko ya Pantekotiste. Mpe alobaki: “Mpo na

kolatáká ba-kupé, mpe kokatáká súki na bango, ná nyonso wana.” Alobaki: “Oyo wana etali yo te.”

Nalobaki: “Etali nani kasi?”

²⁰⁰ Mpe alobaki: “Bato yango, mpo na nini olakisaka basi yango te ndenge ya kozala, ya kozua makabo minene ya molimo, mpe kosunga bato, na esika ya koluka ko . . .” Alobaki: “Bazuaka yo bongo. Oyo oyebisaka bango, bandimelaka yo.” Alobaki: “Mpo na nini oyebisaka bango te ndenge ya kozua makabo minene mpe kosunga bato, na esika ya kokweisaka bango ntango nyonso?”

²⁰¹ Nalobaki: “Ndenge nini nakoki kolakisa bango algebre na ntango oyo bazali ata kokoka koyekola ABC te?” Bomoni? Bomoni?

²⁰² Bosengeli kobanda na nsé, kobóngola motema to kokufa! Sikawa bósala ndenge bolingi, kobóngola motema to kokufa! Yesu Klisto azali komitalisa mpenza polele awa, mpokwa na mpokwa. Mpe mpokwa oyo nde tobúlisaki yango mpo na lobiko ya milimo. Ezali bobele mwa na matambe moke mpo na kokóma awa, mpe nazali na ntango mingi ya kozela.

²⁰³ Bómikanisela, Birmingham, makila na yo ezali likoló na ngai te. Nazali na likambo te. Mpe soki ozali mpenza na Molimo Mosanto, osili kozua libaku ya koya sikawa. Mpe soki ozali kobela bokono ya ki-lingomba moko boye, oyo esili kopesa yo bokono ya kobósana na molimo, mpo na nini oyei te? Yesu azali nkisi oyo ebikisaka. Okolinga te koya?

²⁰⁴ Sikawa, bato mosusu balongwaki na balkó. Nazalaki kozela mpo námona esika oyo bazalaki, soki bazalaki kobima to koya na etumbelo. Baoyo bazali awa, bópusana pembeni. Malamu. Bino baoyo bozali awa, bóya kotelema zingá-zingá ya etumbelo, bóloba: “Nasilisi ná likambo yango.” Iyo, bazalaki kokita awa, ba-madame mibale. Malamu.

²⁰⁵ Bóya kino awa sikawa. Etikali bobele mwa matambe moke. Mpe matambe yango ekoki kobóngola makambo.

²⁰⁶ Sikawa, bótala, nalingi kotuna bino likambo moko. Bongo soki Ayei mpenza na mpokwa oyo? “Oh,” okoloba, “Azoya te.” Ngai nayebi te soki Akoya to te. Oyo nde elembo ya nsuka. Bómikanisela, YANGO ELOBI NKOLO! Bosilá koyoka ngai koloba bongo kozanga ete ézala solo? Bozali komona elembo na bino ya nsuka. Ezali na Makomi. Bosili komona elembo na bino ya nsuka, bino ba-Pantekotiste. Bózua mobulu te sikawa ná oyo Alakaki Yisraele nsima na Konétolama; oyo wana ezali mpo na bino te. Na ntango wana, esili mpo na bino. Bomoni? Sikawa nde mokolo na bino. Sikawa nde elembo na bino. Sikawa nde ntango na bino. Bóboya Yango te. Bósala bongo te. Malamu koleka ete bóya. Bondimi ete nazali mosali na Nzambe? Bómikanisela.

²⁰⁷ Birmingham, nakutáná naino na bato ya malamu koleka bino te. Bozali bato ya malamu koleka oyo nakolinga kokutana

na bango na bomoi na ngai, kasi bosengeli na kolamuka. Bozali kokufa. Bobandi kozua bokono ya kobósana na molimo. Bozali kokufa. Bósala bongo te. Bólamusa eloko oyo bozali na yango. Bólamusa yango lisusu, noki-noki, liboso Yesu áya.

²⁰⁸ Malamu, wana bazali . . . Bókoba koya. Bótika bango bákoba koya kino tokozua baoyo nyonso Nkolo azali kobenga, awa. Bóya sikawa.

²⁰⁹ Bókabwana na bokono ya kobósana wana. Monganga monene azali awa sikawa mpo na kobikisa yango, mpo na kolongola bino yango. Atalisi polele ete Azali awa. Bato boni bakotalisa yango, na kotomboláká loboko, koloba: “Nandimi yango solo; ete Alobaki ete Akosala likambo oyo”? Bomoni? Sikawa Azali awa. Bomoni? Bomoni? Bóndima.

²¹⁰ Mpe bato boni bayebi ete nazali koyebisa bino solo, ete bozali kokufa mpe bosengeli na kolamuka? Bomoni? Ezali solo.

²¹¹ Bozali bato malamumu. Ya malamumu koleka bazali te. Mitema ya malamumu ezali te, koleka oyo ezali kobeta na nsé ya basimísi ya bato ya Súdi awa. Ya solo, bato ya solosolo! Kasi, baminga, ekozala malamumu koleka bólámuka, noki-noki! Na ngonga oyo bokokanisa te, yango ekoki kosalema. Ekoki mpe kozanga kosalema; nayebi te.

²¹² Kasi, bómikanisela, bozali kozua likebisi na bino ya nsuka, boye, bókíma wana bozali na ntango ya kokima. Bóya sikawa. Lokola bazali naino koya, nakokoba kozela, mpo ntango mosusu . . . Elimo moko ezali na motuya ya mikili nkóto zomi. Mpe ntango nyonso oyo bato bazali kondimisama . . .

²¹³ Nakosepela komona yango kokóma kolamuka moko ya monene mpenza, oyo ekokóta na losambo moko na moko ya etúka oyo; soki bobuki bokeseni na bino mpe bolongoli moyimi na bino nyonso, mpo na koyamba Molimo Mosanto. Bolobaki ete bondimi Yango. Bolobaki ete bokondima yango, mpe, ntango Emitalisi, na nsima bokómi kokabwana. Mpo na nini te kosangisa mitema na biso ná Liloba na Nzambe mpe kondima Solo? Yango mpenza. Bokokóba kokufa, kokufa, mpe bokokóta sémba na kati ya Laodikia. Ezali mpenza oyo Alakáki, Ekosalema ndenge wana. Okolinga te koya sikawa? Sikawa nde mokolo yango. Sikawa nde ntango malamumu. Bótala malamumu eloko oyo Molimo Mosanto akosala.

²¹⁴ Sikawa nalingi ete batei nyonso oyo bazali awa, oyo basepeli na bato oyo, báya mpe kobondela elongo ná ngai. Bóya awa, batei nyonso oyo basepeli na bato oyo. Bóya, bóya zinga-zinga, mpe bókota katikati na bato, motei to mosalisi ya bandeko, mosalisi malamumu ya bandeko, mwasi oyo akolinga kotélema elongo ná basi oyo sikawa. Nakondima, na motema na ngai mobimba, ete Molimo Mosanto akoya na esika oyo awa sikawa mpe akomitalisa Ye moko katikati na bato oyo.

215 Sikawa, tika ete nápesa malako na bato oyo. Sikawa, baninga, nyonso oyo boyeli awa, Ayebi yango. Mpe nakoki kotalisa bino yango polele, Akozua moto moko na moko, Akomema bino awa na etumbelo oyo, mpe ekozala na eloko moko te oyo Akozanga kotalisa yango polele. Sikawa esalemaka bongo uta bomwana na ngai. Likabo yango etiámaka ntembe te. Kasi motuna ezali, bokoki koyamba yango? Bondimaka yango? Sikawa Azali awa. Ee, soki Azali awa, na bongo likambo ezali bobele moko, Akokisaka Liloba na Ye. Na bongo bóndima bobele ete bozui yango, mpe bóyamba yango, mpe bótelema mpe bóloba: “Nkolo Nzambe, nazali awa mpo na koyamba yango,” mpe tikala bobele wana kino ésalema.

216 Ndenge Buddy Robinson alobaki mokolo moko, na elanga ya masangu. Alobaki: “Nkolo, soki Opesi ngai Molimo Mosanto te, mokolo Okozonga Okokuta mikuwa elali awa.” Azalaki mpenza na eyóngi. Mpe okozua eloko moko te epai na Nzambe soki ekomi naino te likambo ya bomoi to kufa mpo na yo.

217 Sikawa, bomoni mbuma oyo tobuki lelo, bosili komona lelo likambo oyo tosali? Biso, kútu, tozali na Nzambe ya kokoka kati na biso na lolenge ete toyaka na etumbelo, tolobaka: “Iyo, ntango mosusu ezali malam koleka ete nákende liboso.” Sikawa ezali makambo oyo tobikelaka na mokili mobimba. “Iyo, ezali malam koleka ete nákende kotelema liboso.” Olobi: “Ee, ee, nayebi te. Ngai oyo, omoni.” Hmm! Oyo esika ya kozala mpenza! Móto kopela ezali te. Ezali na komemama moko te. Ezali te na “kende kokóta Kuna!” Mpe, lokola evangeliste, esalaka ngai mpasi mingi mpo na komona libota na Nzambe na lolenge wana. Tosengeli kozala na móto.

218 Kasi, bomoni, ezali nini? Ezali mpenza ndenge nauti koyebisa bino. Emoniseli 3: “Bozali mwa móto moke. Mpe,” Alobaki, “lokola bozali mwa móto moke, na bongo, Nakosánza bino na monoko na Ngai.” Ezali bongo? Yango nde oyo Alobaki. Mpe, soki Alobaki bongo, yango nde oyo Akosala. Boye, tika ete tózala etonga wana te.

219 Bozali awa, ná bosenga. Tózua Yango, to tókufa, kaka awa. Ya solo. Tózua Yango, to tókufa.

220 Sikawa, ndeko na ngai molingami ya mobali, ya mwasi, soki nakokaki kokita mpe kosunga yo mpo ósala likambo moko, na ntembe te, nalingaki kosala yango. Sikawa, na nzela na likabo moko, nakoki koyebisa yo ntina oyo oyeli awa. Nakoki koyebisa yo yango, na nzela ya Molimo Mosanto, na nzela ya Molimo na Nzambe, koyebisa yo ntina oyo oyeli, oyo bosilá kosálá, oyo ekosalema nsima te eloko moko ya ndenge wana; kasi yango ekokata likambo te. Bosengeli nde koyamba Oyo, yo moko. Esengeli kozala yo!

221 Sikawa obelemi? Tómbola loboko, lobá: “Nabelemi. Nabelemi mpo na kokufa awa.” Sikawa kosala yango te

soki euti na motema te. “Nabelemi kokufa awa, to kozua oyo nalingi ete Nzambe ápesa ngai.” Amen. Obelemi solo mpenza?


²²² Na bongo, tika ete eyanganelo ételema, bipai nyonso. Sikawa elongo, elongo, tósangana elongo. Tóbondela. Mpe tó...Bino batei sikawa, bóya awa epai ya bato oyo, moko na moko, mpe bozali kotalisa maboko ya Klisto sikawa.

²²³ Yo oyo ozali na mposa ya Molimo Mosanto, yo oyo ozali na mposa ya kobikela makambo, ezali eloko ya komemama na kotúntuka te; olingi kozua Molimo Mosanto, Bomoi, momboto ya Bomoi na kati na yo. Mpe olingi kokabwana na bokono ya kobósana wana, oyo esalaka ete ó—ókoka komitalisa te; oyebi te esika nini otelemi; oyebi te oyo ozali; tókabwana na yango sika-sikawa! Mbotama ya sika ezali awa mpo na yo, Mbotama ya sika oyo ya solosolo.

²²⁴ Sikawa tótiela bato yango maboko. Bisó nyonso, tótombola maboko mpe tóbondela na motema moko.

²²⁵ Tata na Likoló, na Nkombo na Nkolo Yesu, kokisa, Nkolo, ete na Nkombo na Yesu Klisto, Molimo Mosanto éya na mpokwa oyo, na mpokwa ya mokolo ya mpóso oyo, lokola ntango Molimo Mosanto ekitaki lokola moepepe makasi. Tika ete bato oyo bábatisama na Molimo Mosanto. Tika ete Móto mpe Nguya ya Nzambe étika bango te. Soki bazali awa na ntongo, tika ete bátikala, bátikala kino Molimo Mosanto éya.

²²⁶ Yango nde likanisi! Ezali bongo! Tala Yango wana. Ezali Molimo Mosanto koya. (Nasili kosala yango. Nayebi yango.)

Esili. Bóndima Yango sikawa! Bóyamba Yango! Bótondisama na mapamboli na Ye. 

64-0411 Bokono Ya Kobósana Na Molimo
Armurerie Ya Garde Nationale
Birmingham, Alabama U.S.A.

LINGALA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyikanisama te, kotiamana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, koméla:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org